

Kuyantika 1**Kuyantika 2****Yobi****Kuyantika 3****Kuyantika 4****Kuyantika 5****Kubasika-Levi****Kutanga-Kulonga****Yozue****Bazuzi-Ruti****1 Samuele, Bankunga****2 Samuele, 1 Bansangu****1 Bantotila****2 Bantotila, 2 Bansangu****Ezekiele, Daniele**Photo: www.freebibleimages.org/Sweetpublishing Matondo!

Le Projet MWINDA—
Ministères pour Chaque Enfant

Ezekiele ti Daniele

Bamvula 70 na Babilonia
(Baleso 12 sambu na bana ti bajeune)

Musoniki: *Mama Lorella Rouster. MCE*

Edition 2025

www.ecodimafrique.com
ministerespourchaqueenfantrdc@gmail.com

Mikanda ya EZEKIELE ti DANIELE—Bamvula 70 na Babilonia

Ngindu ya nene ya baleso yai ya Daniele :

KIKESA kukonda LULENDO. Beto bantu ya Nzambi lenda zinga ti tuba na kikesa, sambu beto zaba nde Nzambi kele na lukanu ya mbote ya muntu lenda bebisa ve. Kansi beto zinga to tuba ve na lulendo, sambu beto zaba nde, kele beto ke yala ve, kansi Nzambi.

Moniteur, NB ! Kana nge kele na Bible, nge lenda tanga histoire ya mvimba na preparasio. Kansi na meso ya bana, tangila bo kaka bitini ya beto me tula. Beto me katula bima ya nkaka sambu na kumisa histoire nkufi, na mpila nde bana lenda kusimba yo. Beto me sadila versio Mwindi sambu na bana. Kutanga lenda vanda ndambu luswaswanu ti version na nge.

Mukanda yai kele na baleso yai :

Page

Partie I. Profete Ezekiele

Leso 1- Nzambi songaka Ezekiele nsudi ya masumu ti zuzema ya Nzambi. Ezekiele 4 :9-17	3
Leso 2- Nzambi songaka Ezekiele kisina ya lulendo ya bamfumu ti ya masumu yonso, mpi zuzema yo ta benda. Ezekiele 28:1-17	6
Leso 3- Nzambi songaka Ezekiele nde kele Nzambi yina pesa moyo na bantu me fwa. Ezekiele 37:1-13..9	

Partie II. Profete Daniele

Leso 4- Daniele ti banduku na yandi songaka kikesa kusola nzila ya Nzambi ti kubuya madia ya mfumu ya nene. Daniele 1	12
Leso 5- Daniele vandaka kikesa kusosa ngangu ya Nzambi kaka, sambu yandi bakisaka nde Nzambi zaba mambu yonso. Daniele 2.....	15
Leso 6- Banduku ya Daniele songaka kikesa kubuya bisambu ya kiteki. Daniele 3	19
Leso 7- Mfumu Nabu zwaka ndola sambu na lulendo na yandi, kansi Nzambi wilaka yandi mawa ntangu yandi kudikulumusaka. Daniele 4	23
Leso 8- Mfumu Baltazare bwaka na lulendo, yo yina Nzambi manisaka kimfumu na yandi. Daniele 5	26
Leso 9- Daniele vandaka na kikesa kusamba konso ntangu. Yo yina, Nzambi lundaka yandi na dibulu ya bantambu. Daniele 6	29
Leso 10 -Visio ya Daniele ya ntangu ke kwisa—Bimfumu ta nwana, ‘muntu ya mbi’ ta yala fioti, kansi Nzambi ta yala na nsuka. Daniele 7	33
Leso 11-Wanzio Gabriele songaka Daniele nki ntangu Mesia fweti kwisa. Daniele 9	37
Leso 12- Nzambi songaka Daniele nde mambu yonso ya ta kwisa, yo kele na maboko na Yandi. Daniele 10-12	40
Bangindu kulonga mikanda ya Bible	43
Balinya ya Ntangu	44
Bankunga beto sadila na baleso yai.....	46

Matondo sambu na bafoto na www.freebibleimages.com/Sweet Publishing, /Lambsongs, /New Harvest Min. Int. Inc.

Partie I. Profete Ezekiele

Leso 1- Nzambi songaka Ezekiele nsudi ya masumu ti zuzema ya Nzambi.

Leso ke monika na Ezekiele 4 :9-17.

I. PREPARASIO SAMBU NA MONITEUR-

Kuyidika na ntswala : Nata mbuma ya luku to ya nkwanaga. Nge ta sadila yo na malongi 1.1 ya lesa.

☉ Kikuma ya Lesa :

Bana ta bakisa nde mbala mingi beto bantu mona masumu bonso mambu ya nene ve, kansi Nzambi mona yo makambu mpenza.

♥ Verse ya Kulonguka :

[Atasio, moniteur ! Na baleso yonso, partie ya verse sambu na bana prescolaire kele souligne bonso yai.]

Beto yonso, beto kele bonso bantu ya mvindu. Ata mambu ya mbote ya beto sala, yo kele kaka bonso bilele ya mvindu. Sambu na mbi na beto, beto kele bonso matiti ya kuyuma, ya mupepe ke nata ntama. Yezaya 64 :5

🔊 Bankunga ya kwenda nzila mosi ti lesa :

Mawa, Mawa Kuvanda Mwana-Satana
Yezaya 53 :6

II. REVISIO

† Kuyindula diaka baleso me luta :

Beto me longuka nde ata na nima Nzambi fwaka kimfumu ya Israele sambu na masumu na bo, bampangi na bo na Kimfumu ya Yuda landaka kusala mbi. Ndambu bamfumu landaka Nzambi, kansi mingi landaka Yandi ve.

Yo yina, na bilumbu ya Mfumu Yoyakina, Nzambi pesaka bambeni nzila kubedisa bo. Ntangu yina, bo ziungaka Yeruzalemi tii ntangu madia yonso manaka. Bo fwaka bwala yina ti tulaka yo tiya. Bo kangaka baprofete Ezekiele ti Daniele, ti nataka bo na Babilonia. Kansi ata na nsi yina ya ntama, Nzambi landaka kutuba na bo.

III. KULONGA LESO YAI

➔ Kuyantika :

Ezekiele vandaka nganga-Nzambi ti profete penepene na bilumbu ya nsuka ya Yeruzalemi. Yandi bendaka bantu kuvutuka na Nzambi, kansi bantu mingi waka yandi ve. Na lesa yai, beto ke mona nki Nzambi songaka yandi na bilumbu ya nsuka ya kimfumu, na ntswala yandi kwendaka na Babilonia.

🏠 Malongi ya nene ya lesa yai (developpement) na banti ya malongi 4 :

1.1 Nzambi songaka Ezekiele nde yandi sala madia bonso luku, yandi kotisa ntufi ya muntu, yandi kudia yo. Yo vandaka kusonga mambu ya fweti kwisa, ntama mingi ve.

📖 Tangila bana : Ezekiele 4 :12

12 (Nzambi ke tuba na Ezekiele :) Baka kabine ya bantu, tula yo tiya, ebuna yokila yo mampa. Kudia yo na meso ya bantu yonso.

Visuel-

Moniteur, songa bana ndambu ya luku to nkwanaga nge me nata. Yula bo nde, kana bo zabaka nde ntufi ya muntu vandaka na kati, keti bo ta dia yo ?

? Yula bana

🏃 Bana sala bageste to mwa-senete

🔊 Bana yimba ti kina

1.2 Yai ke songa nde bilumbu ya mpasi ta kwisa. Bantu fweti dia bima ya mvindu kaka sambu na kuzinga. Yo salamaka ntangu basoda ya Babilonia ziungaka bwala na bo.

📖 Tangila bana : Ezekiele 4 :13

13 Mfumu Nzambi tubaka diaka nde : « Ntangu Mono ta panza beno na kati na bantoto ya nzenza, yai kele mutindu beno ta dia madia ya mvindu. »

? Yula bana

🏃 Bana sala bageste to mwa-senete

🔊 Bana yimba ti kina

1.3 Ezekiele zolaka ve kudia yo, ebuna Nzambi pesaka yandi nzila kusadila tufi ya ngombe na sika ya tufi ya muntu.

 **Tangila bana :** Ezekiele 4 :14-15

14 Kansi Ezekiele tubaka nde : “Kele ve, Mfumu... Katuka kileki na mono, mono me diaka ntete ve...madia ya mvindu. »

15 Ebuna Nzambi nde : « Kima ve. Mono me pesa nge wese ya ngombe. Nge ta sala mampa na nge na yo. »

? Yula bana

 **Bana sala bageste to mwa-senete**

 **Bana yimba ti kina**

1.4 Nzambi nde : Bantu ya Yeruzalemi ta fwa sambu na masumu na bo. Yo vandaka makambu ya nene na meso ya Nzambi.

 **Tangila bana :** Ezekiele 4 :16-17

16 Nzambi tubaka diaka nde : « Nge, muntu, zaba nde Mono ke pesa diaka ve bantu ya bwala Yeruzalemi mampa. Yo ta vanda ya kulunga diaka ve. Ata masa mpi ta vanda ya kulunga diaka ve.

17 ...Yai ikele ndola sambu na masumu na bo. »

? Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Nzambi vandaka kusonga Ezekiele nde bantu ya Yeruzalemi monaka masumu na bo bonso yo kima mosi ya fioti. Kansi Nzambi monaka yo nsudi ti mvindu, ya nzanzi bonso kima Yandi lendaka kusimba ve. Yo pesaka Nzambi nzala ya kuluka bonso kana muntu fweti kudia ntufi. Yo yina, zuzema fweti simba bo. Masumu kele mambu ya nene na meso ya Nzambi !

 **Devoir sambu na bakristo :**

Bana bakristo, bantu ya zaba Nzambi ve, bo mona masumu kima ya fioti, bonso bantu ya Yeruzalemi. Kansi beto bakristo bakisa nde yo kele kima ya

nzanzi. Nzambi zola yo ve ata fioti. Mposho yai, bika beto tina masumu. Kana beto kubwa na disumu, beto ndima yo nswalu ti lombamba Nzambi kuyika beto ngolo kubika yo.

 **Verse ya Kulonguka :**

Beto yonso, beto kele bonso bantu ya mvindu. Ata mambu ya mbote ya beto ke salaka, yo kele kaka bonso bilele ya mvindu. Sambu na mbi na beto, beto kele bonso matiti ya kuyuma yina ya mupepe ke nata ntama. Yezaya 64 :5

 **Bankunga ya kwenda nzila mosi ti lesa :**

Mawa, Mawa Kuvanda Mwana-Satana
Yezaya 53 :6

 **Invitation sambu na bo ya me yamba Yesu ntete ve :**

Mbala ya nkaka nge me yamba Yesu ntete ve bonso Mvulusi na nge. Nge me bakisa ntete ve nde masumu na nge me kotisa nge na makambu ti Nzambi. Masumu kele ve kaka nde nge kele parfait ve. Masumu kele makambu. Nsuka na yo kele lufwa.

Kana nge telama na ntwala ya Nzambi kukonda Yesu Kristo, Yandi ta mona nge bonso tufi. Nsudi. Mvindu.

Kansi ata masumu na nge kele nsudi ya mbi na Nzambi, Yandi zola nge. Yandi tindaka Mwana na Yandi Yesu Kristo sambu na nge. Yesu fwaka na sika na nge. Masumu yonso ya nsudi ya nge, Yesu bakaka yo na zulu na Yandi. Yandi futaka mfuka ya nge zolaka kufuta na Nzambi sambu na yo.

Na nima, Yandi telamaka na lufwa, sambu bantu yonso bakisa mbote nde Nzambi me ndima nkailu na Yandi.

Yesu me sila nde, konso muntu yina kwisa na Yandi, Yandi ta buya yandi ve (Yoane 6 :37b). Kana nge me kwisa na Yandi ntete ve, O, kwisa na Yandi bubu yai. Balula ntima ti tula kivuvu yonso na Yandi kaka. Nge ta kuma mwana na Yandi !

NSUKA YA LESO 1

 Kana ntangu lunga, longa mikanda ya Bible ndambu-ndambu. Bangindu kele na p. 43.

Leso 1

Nzambi songaka Ezekiele yandi tula tufi na madia na yandi. Aii! Yandi zolaka kusonga bantu na yandi nde, ata bo monaka masumu na bo kima ya fioti, Yandi monaka yo nsudi ti nzanzi bonso tufi.



Beto yonso, beto kele bonso bantu ya mvindu.

Ata mambu ya mbote ya beto sala, yo kele kaka bonso bilele ya mvindu.

Sambu na mbi na beto, beto kele bonso matiti ya kuyuma, ya mupepe ke nata ntama.

Yezaya 64 :5

Leso 2 Nzambi songaka Ezekiele kisina ya lulendo ya bamfumu ti ya masumu yonso, mpi zuzema yo ta benda.

Leso ke monika na Ezekiele 28 :1-17.

I. PREPARASIO SAMBU NA MONITEUR-

☉ Kikuma ya Leso :

Bana ta tina lulendo sambu bo ta bakisa nde kisina na yo kele Satana.

♥ Verse ya Kulunguka :

(Nzambi ke tuba na Mfumu ya bwala Tire, mpi na Satana) : Nge kumaka lulendo mingi sambu na kitoko na nge. Yo yina, Mono me losa nge na ntoto... Ezekiele 28 :17

🔊 Bankunga ya kwenda nzila mosi ti leso :

Kudikulumusa na meso ya Nzambi
Mo' Ta Kwisa na Nzambi na Lulendo Ve

II. REVISIO

📖 Kuyindula diaka baleso me luta :

Na leso me luta, beto monaka Ezekiele na ntoto na yandi, Yuda, na ntwala zuzema ya Nzambi bwaka na bwala na yandi. Bubuyai, beto ta mona visio Nzambi songaka yandi na nima bambeni me kanga yandi, me kumisa yandi mpika na nsi ya Babilonia.

III. KULONGA LESO YAI

➔ Kuyantika :

Nzambi songaka Ezekiele mpila Nzambi ta pesa ndola na bantwadisi ya mbi—bantwadisi ya Yuda, ti bantwadisi ya bansi ya nkaka. Bubuyai, beto ta mona ndola to zuzema ya Nzambi ta pesa Mfumu ya bwala mosi ya nene zina ya Tire.

🏠 Malongi ya nene ya leso yai (developpement) na banti ya malongi 4 :

2.1 Nzambi songaka nde mfumu ya Tire vandaka lulendo mingi. Yandi kuditulaka kuvanda bonso Nzambi, ata yandi vandaka kaka muntu.

📖 Tangila bana : Ezekiele 28 :1-2

1 Mfumu Nzambi tubaka na mono Ezekiele nde :

2 « ...Songa mfumu ya bwala Tire mambu ya Mono Mfumu Nzambi ke tuba nde : 'Nge ntotila ya Tire, nge ke tula lulendo. Nge ke tuba nde nge kele bonso Nzambi. Nge ke tuba mpi nde nge me vanda na zulu ya kiti ya kimfumu bonso Nzambi.... Nge ke kuditula kuvanda bonso Mono Nzambi, kansi nge kele muntu. Nge kele Nzambi ve.' »

? Yula bana

✍ Bana sala bageste to mwa-senete

🔊 Bana yimba ti kina

2.2 Mfumu ya Tire waka lulendo sambu yandi vandaka mayele ti mvwama.

📖 Tangila bana : Ezekiele 28:3-5

3 'Nge ke yindula nde nge me luta Daniele na mayele, nde kinsweki yonso, nge me zaba yo.

4-5 Mayele na nge me kumisa nge mvwama mpenza. Kisalu na nge ya kuteka bima me yikaka nge wolo ti arza mingi. Yo yina, nge me kuma lulendo sambu na kimvwama na nge yonso.'

? Yula bana

✍ Bana sala bageste to mwa-senete

🔊 Bana yimba ti kina

2.3 Nzambi zengaka zuzema sambu na mfumu yina. Banzenza ta kwisa kukulumusa yandi.

📖 Tangila bana : Ezekiele 28 :6-10

6-7 Ntangu yai, Mono Mfumu Nzambi ke tuba nde : 'Sambu nge ke yindula nde nge kele mayele bonso Nzambi, Mono ke natila nge bambeni ya nku mpenza kukwisa kunwanisa nge. Bo ta fwa bima na nge yonso ya nge bakaka na mayele na nge.

9 Ntangu bo ta kwisa kufwa nge, keti nge ta tuba diaka nde nge kele bonso Nzambi ?....

11.4 Nzambi songaka nde kisina ya lulendo na yandi vandaka nkwa-lulendo yonso, Satana.



[Moniteur, songa bana nde bo kuwa mbote, bo nangula diboko ntangu bo kuwa bandinga ya kele kutuba kaka na Mfumu ya Tire ve, kansi na Satana.]

Tangila bana baverse yai : Ezekiele 28 :11-17

Kidimbu 🖐 ke songa partie ya ke tuba sambu na Satan.

11-12 Mfumu Nzambi tubaka na mono Ezekiele diaka nde : “...Yimba nkunga ya mafwa sambu na ntotila ya bwala Tire. Songa yandi mambu ya Mono Mfumu Nzambi ke tuba nde : ‘Ntete nge vandaka muntu mosi ya mbote. Nge vandaka mayele mingi ti kitoko mingi.

13 🖐 Nge vandaka kuzinga na Edeni, kilanga ya Nzambi. Nge vandaka kulwata matadi ya kitoko....

14 🖐 ...Nge vandaka kuzinga na zulu ya ngumba ya Mono Nzambi ti kutambula na kati ya matadi ya ke pela.

15 🖐 Bifu na nge vandaka ntete mbote ...tii na kilumbu ya nge yantikaka kusala mbi.

16 🖐 ...Nge me sala mambu ya nku ti masumu. Yo yina, Mono katulaka nge na zulu ya ngumba na Mono...

17 🖐 Nge kumaka lulendo mingi sambu na kitoko na nge...Yo yina Mono me losa nge na ntoto...

>|< Kumanisa Malongi :

Nzambi songaka profete Ezekiele kusonga Mfumu ya Tire nde Nzambi me zuze yandi, Nzambi me zenga yandi ndola. Sambu na nki ? Sambu yandi kuditulaka bonso yandi vandaka Nzambi. Lulendo ya ngolo, ya mbi ! Nzambi songaka mpi nde kisina ya lulendo yina kele Satana. Nzambi salaka yandi mbote, kansi na lulendo, yandi zolaka kuditula na sika ya Nzambi Yandi mosi. Nzambi katulaka Satana na zulu sambu na lulendo na yandi. Nzambi ta katula Mfumu ya Tire na kimfumu na yandi mpi, yonso sambu na lulendo na yandi. Kele ve Nzambi ke pesa bantu lulendo. Kisina na yo kele Satana.



Devoir sambu na bakristo :

Beto bakristo ! Beto sala atasio. Beto tina lulendo. Beto kudikulumusa na ntwala ya Nzambi yina

salaka beto. Yandi kele Nzambi, ti beto kele bantu na Yandi.

♥ Verse ya Kulonguka :

Bana tuba verse mbala zole fraze na fraze na nima ya nge, moniteur. Tendula nde Yandi ke tuba mbala mosi na mfumu ya lulendo ya bwala Tire, ti mbala mosi na Satana, kisina ya lulendo yonso. Bo tuba yo mbala zole diaka ti bageste. Na nsuka, bo tuba yo na competisio.

🗨 Bankunga ya kwenda nzila mosi ti leso :

Kudikulumusa na meso ya Nzambi
Mo’ Ta Kwisa na Nzambi na Lulendo Ve

✝ Invitation sambu na bo ya me yamba Yesu ntete ve :

Mbala mingi, Satana ta sadila lulendo kukanga muntu nzila kukwisa na Yesu Kristo. Yandi ta songa yandi nde yandi ke na mfunu ya Yesu ve, nde yandi kele ndambu mbote, nde bantu ya nkaka kele mbi kuluta yandi, nde yandi mosi lenda kudiguluka. Yai yonso kele luvunu ya Satana.

Beto kele bankwa masumu. Masumu me natila beto lufwa ti makambu ti Nzambi. Bible songa pwelele nde muntu lenda guluka ve na mambu ya mbote yandi ke sala. Kaka menga ya Yesu Kristo, Mwana ya Nzambi, lunga kugulusa beto.

Kuwa ve mabanza ya Satana. Kudikulumusa na ntwala ya Nzambi bubuyai. Balula ntima na Yandi ti ndima nde nge kele na mfunu ya Yesu Kristo. Kana nge yamba Yandi, Yandi mpi ta yamba nge bonso mwana na Yandi.

NSUKA YA LESO 2

📖 Kana ntangu lunga, longa mikanda ya Bible ndambu-ndambu. Bangindu kele na p. 43.



Leso 2

Nzambi
salaka
Satana
wanzio ya
mbote ti ya
kitoko.
Kansi Satana
kumaka
lulendo.
Yandi zolaka
kubaka sika
ya Nzambi.
Yo yina
Nzambi
katulaka
yandi na
zulu.
Nzambi ke
zolaka
lulendo ve !

***Nge kumaka lulendo mingi
sambu na kitoko na nge.***

***Yo yina Mono losaka nge na
ntoto...***

Ezekiele 28 :17

Leso 3- Nzambi songaka Ezekiele nde kele Nzambi yina pesa moyo na bantu ya kufwa.

Leso me monika na Ezekiele 37 :1-13.

I. PREPARASIO SAMBU NA MONITEUR-

Kuyidika na ntwala : Kana mpila ikele, sosa mukwa ya mbisi ya kuyuma. Nge ta sadila yo sambu na kuyantika leso.

☉ Kikuma ya Leso :

Bana ta bakisa nde Nzambi yina pesaka moyo lenda pesa yo diaka, ata beto me fwaka. Yandi ta tedimisa bantu na lufwa.

♥ Verse ya Kulonguka :

Nzambi tedimisaka Mfumu Yesu na lufwa, ebuna Yandi ta tedimisa beto mpi na ngolo na Yandi.
1 Korinto 6 :14

👤 Nkunga ya kwenda nzila mosi ti leso :

Mono Kele na Nzo Kitoko--
yika verse yai : Yandi ta tedimisa beto
Ya mene kufwaka (3x) Beto ta zinga diaka !

II. REVISIO

† Kuyindula diaka baleso me luta :

Beto me mona mpila Nzambi songaka Ezekiele mambu, nki ta kwisila bamfumu. Yandi songaka yandi nde mfumu mosi vandaka na probleme ya lulendo. Lulendo yai me katuka wapi ? Kisina na yo, Satana yandi mosi, mbeni ya Nzambi. Yandi vandaka wanzio ya kitoko ti ya mbote, kansi yandi bwaka na lulendo. Yo yina, yandi kumaka mbeni ya Nzambi.

III. KULONGA LESO YAI

➔ Kuyantika :

Bubuyai beto ta yindula visio ya nkaka ya Nzambi songaka Ezekiele. Mono banza nde muntu me mona visio bonso yo ntete ve. Yo tadilaka dibengi fuluka ya mikwa ya kuyuma. [Moniteur, kana mukwa ya kuyuma ikele, songa yo na bana. Yula keti yo kele na moyo. Keti yo lenda tambula yo mosi ?]

🏠 Malongi ya nene ya leso yai (developpement) na banti ya malongi 4 :

3.1 Nzambi songaka Ezekiele dibengi fuluka ya mikwa ya kuyuma. Yandi yulaka keti mikwa yina ta zinga diaka.

📖 Tangila bana : Ezekiele 37 :1-3

1 Mfumu Nzambi simbaka mono, Mpeve na Yandi nataka mono na dibengi mosi fuluka na mikwa.

2 Yandi tambusaka mono ndambu na ndambu ya dibeni na kati ya mikwa. Mono monaka nde kuna vandaka mikwa mingi ya kuyuma.

3 Yandi yulaka mono nde : «...Keti mikwa yai lenda zinga diaka ? » Mono vutulaka nde : « Mfumu, Nge kaka lenda pesa mvutu. »

? Yula bana

✍ Bana sala bageste to mwa-senete

👤 Bana yimba ti kina

3.2 Nzambi songaka Ezekiele kutuba na mikwa yina sambu bo zinga diaka. Yandi salaka yo, ebuna misisa ti misuni kwisaka kufika mikwa.

📖 Tangila bana : Ezekiele 37 :4-8

4-5 Yandi tubaka nde, «... Songa mikwa yai nde : “Kuwa ndinga ya Nzambi. Mono ke pesa beno mupepe ya moyo. Beno ta zinga diaka.”

6 Mono ke pesa beno misisa ti misuni kufika beno mukanda ya nitu... Mpidina, beno ta zaba nde Mono kele Mfumu Nzambi.

7-8 Yo yina, mono salaka mutindu Mfumu Nzambi songaka mono. Ntangu mono vandaka ke tuba, mono waka makelele, ebuna mono monaka mikwa ke kangama mukwa na mukwa, mpusu mpi ke fika mikwa. Kansi bamvumbi yina vandaka kupema ve.

? Yula bana

✍ Bana sala bageste to mwa-senete

👤 Bana yimba ti kina

3.3 Nzambi songaka Ezekiele kutuba na mupepe, yo kwisa kota bamvumbi. Yandi salaka yo, ebuna bamvumbi yantikaka kuzinga diaka.

Tangila bana : Ezekiele 37: 9-10

9 Ntangu yai, Nzambi tubaka na mono nde :
« ...Songa mupepe mambu ya Mfumu Nzambi
me tuba : yo katuka na ndambu yonso, yo kwisa
kukota na bamvumbi, sambu bamvumbi
kuzinga diaka. »

10 Yo yina, mono tubaka mutindu Nzambi
songaka mono. Mupepe kotaka na bamvumbi.
Bo zwaka moyo, bo telamaka. Bo vandaka
mingi.

? Yula bana

 **Bana sala bageste to mwa-senete**

 **Bana yimba ti kina**

**3.4 Yai zolaka kusonga nde ata Kimfumu ya
Yuda kufwa, Nzambi ta tedimisa yo diaka.
Na Kuwakana ya Mpa beto longuka nde Yandi
ta tedimisa bantu yonso mpi na lufwa.**

Tangila bana : Ezekiele 37 :11-14, 1 Korinto 6 :14

Ez. 37 :11 Mfumu Nzambi tubaka na mono
diaka nde : “Bantu ya Israele kele bonso
bamikwa yai. Bo ke mona bonso bo me yuma...

12 Yo yina... Songa bo mambu ya Mono
Mfumu Nzambi ke tuba nde : ‘O, bantu na
Mono, Mono ta kangula maziama na beno.
Mono ta tedimisa beno. Mono ta vutula beno
na ntoto ya Israele...

14 Mono ta tula Mpeve na Mono na kati na
beno. Beno zinga ti Mono ta vutula beno na
ntoto na beno. Ebuna beno ta zaba nde kele
Mono tubaka nde Mono me tuba mambu yai, ti
kele Mono yina ta sala yo mpi. »

1 Korinto 6 :14 Nzambi tedimisaka Mfumu
Yesu na lufwa, ebuna Yandi ta tedimisa beto
mpi na ngolo na Yandi Nzambi.

>|< Kumanisa Malongi :

Kele Nzambi kele na kiyeka na zulu ya moyo ti
lufwa. Nzambi tubaka nde ata masumu ya Israele
me natila bo lufwa, Yandi ta tedimisa bo ti vutula
bo na nsi na bo diaka.

Nzambi songaka ngolo na Yandi kutedimisa muntu
na lufwa ntangu Yandi tedimisaka Yesu Kristo.

Yandi me sila mpi nde kiteso mosi, lumbu ta kwisa
nde Yandi ta tedimisa beto yonso.

? Yula bana

 **Bana sala bageste to mwa-senete**

 **Bana yimba ti kina**

Devoir sambu na bakristo :

Bana bakristo, keti dibanza ya lufwa ke pesa nge
boma ? Beto bakristo fweti vanda na boma ve. Ata
mikwa na beto kuyuma yonso, beto zaba nde
Nzambi ta tedimisa beto sambu beto zinga diaka,
nitu ti moyo, na Kimfumu na Yandi. Beto vutula
Yandi matondo.

Verse ya Kulonguka :

Bana tuba verse mbala 2 fraze na fraze na nima ya
nge, moniteur. Bo yika bageste ti tuba yo mbala 2
diaka. Bo pumbuka kutuba yo mbala 2 ya nsuka.

Nkunga ya kwenda nzila mosi ti leso :

Bana yimba nkunga ke kwenda nzila mosi na leso.

Invitation sambu na bo ya me yamba Yesu ntete ve :

Kansi, kana nge ke landa nzila ya Yesu ve, lufwa
fweti vanda boma. Bible ke tuba nde Yesu ta
tedimisa bantu na lufwa na bandambu zole. Ya
ntete, Yesu vutuka kubaka bantu na Yandi.
Kutelama yina, kiese mingi !

Yandi ta tedimisa ndambu ya nkaka ya bantu na
nima, na ntangu ya zuzema. Kuwa Bible : « Nzambi
sambisaka bantu ya kufwa...Nzadi-mungwa
vutulaka bantu ya kufwa yina fwaka na masa. Nsi
ya bafwa vutulaka bantu na yo. Ebuna Nzambi
sambisaka bo yonso. Konso muntu ya bo monaka
zina na yandi ve na Mukanda ya Moyo, bo losaka
yandi na dizanga ya tiya... Yina kele lufwa ya zole.
(Kusonga 20 :12b-15).

Nzambi zola ve nge kwenda kuna. Yandi pesaka
Mwana na Yandi ya kitoko Yesu Kristo na mpila
nde nge lenda kota na bwala na Yandi ti zinga na
kintwadi ti Yandi mvu ya mvu. Ketu nge ta zenga
bubuyai kubalula ti kukota na nzila na Yandi ?

NSUKA YA LESO 3

 Kana ntangu lunga, longa mikanda ya Bible
ndambu-ndambu. Bangindu kele na p. 43.

Leso 3



*Nzambi
songaka
Ezekiele
visio ya
dibungi ya
kufuluka
ya mikwa
ya kuyuma.
Nzambi
tedimisaka
mikwa yina
kubaka
moyo
diaka.*

**Nzambi tedimisaka Mfumu
Yesu na lufwa,
ebuna Yandi ta tedimisa beto
mpi na ngolo na Yandi
Nzambi.**

1 Korinto 6 :14

Partie II. Profete Daniele

Leso 4—Daniele ti banduku na yandi vandaka na kikesa kusola nzila ya Nzambi ti kubuya madia ya mfumu ya nene.

Daniele 1

**Baleso yai ya Daniele ke songa KIKESA !
Boma ve !**

Disongidila ya bandinga yai : *(Moniteur tendula, ebuna bana repeter.)*

KIKESA kele kutula ntima nde Nzambi ta sala sambu na beto bantu na Yandi na mpila nde, na nsuka, yonso ta vanda mbote sambu na beto. Yo yina, ata na ntangu ya mpasi, beto lenda mona ngolo kusala mbote.

BOMA kele contraire ya Kikesa. Boma kele kuwa na ntima nde Nzambi ta sala ve na mpila ya ta sadisa beto.

I. PREPARASIO SAMBU NA MONITEUR-

☉ Kikuma ya Leso :

Bana ta zenga na ntima kulanda Nzambi, sambu bo ta bakisa nde Nzambi lenda pesa beto kikesa kulanda nzila na Yandi konso sika bo kele.

♥ Verse ya kulunguka :

Daniele zengaka na nsi ya ntima nde : « Mono lenda dia ve madia to kunwa vinu ya mfumu. Yina ta kumisa mono mvindu na bansiku na beto... »...
Daniele 1 :8a

🔊 Bankunga ya kwenda nzila mosi ti leso :

Daniele Sambaka Mingi Vs.1
Kikesa Kele

II. REVISIO

† Kuyindula diaka baleso me luta :

Bantu ya Yuda salaka mbi ti sambaka banzambi ya luvunu. Nzambi tindilaka bo baprofete mingi kuvutula bo na nzila, kansi bo buyaka. Na ntangu ya Mfumu Yoyakimi, Nzambi pesaka nzila nde Mfumu ya Babilonia kukanga ndambu bantu ya Yuda, kunata bo kukuma bampika na ntoto na yandi. Na kati vandaka muntu mosi ya kinzambi

zina ya Daniele. Baleso yai ke songa luzingu na yandi na Babylone.

III. KULONGA LESO YAI

➔ Kuyantika Leso :

Kana mono tuba ndinga “Kikesa,” nge yindula nki ? (Moniteur, pesa bana mpila ya kuvutula mvutu.) Bantu mingi yindula bantu bonso basoda. Bo yindula mambu bonso kunwana na mvita. Yina kele kikesa ya mutindu mosi.

Kansi, bana mingi kele na boma ya mambu ata na nzo-nkanda. Bo ke na boma nde bo ta nunga ve, Yo yina, bo zola kusala ngolo mingi ve. Bo kele na boma nde bo ta zaba ve mvutu ya mbote. Yo yina, bo yindula nde bo fweti yiba mvutu ya muntu ya nkaka, to bo fweti sala tricherie na nzila ya nkaka. To, bo kwenda kufuta mbongo kusosa nkisi ya ngolo ya bo mona lenda pesa bo nzila kununga.

Bana ya nkaka ke na boma kusala konso kima, kana bo banza nde banduku na bo ta landa bo ve. Bo mona bonso bo fweti sala kiteso mosi bonso bantu ya nkaka.

🏠 Malongi ya nene ya leso yai (developpement) na banti ya malongi 3 :

4.1 Ata Daniele me kuma mpika na nsi ya nkaka, yandi zengaka nde yandi ta landa nzila ya Nzambi.

📖 Tangila bana : Daniele 1 :2-8

2 Mfumu Nzambi pesaka Yoyakimi na maboko ya mfumu ya nene ya Babilone Nebu... Yandi nataka bantu ya yandi kangaka tii na nsi ya Babilonia...

3-4 Mfumu Nebu tubaka na... kapita ya basielo na yandi nde : “Na kati ya bantu ya Israele ya beto me kanga, nge sola bana-babakala ya kitoko, bana ya mayele. Bo ta sala kisalu ya nzo ya mono. Longa bo kutanga ti kusionika ndinga na beto bantu ya Babilonia.”

5 Nebu tubaka mpi nde bana yango fweti dia madia ti kunwa vinu ya yandi. Balongi fweti long a bo bamvula tatu. Na nima bo fweti kwisa kusonga bo na mfumu.

6 Na kati ya bana ya bo solaka vandaka Daniele ti banduku 3 na yandi.

8 Daniele zengaka na nsi ya ntima nde :
« Mono lenda dia ve madia to kunwa vinu ya mfumu. Yina ta kumisa mono mvindu na bansiku na beto... »

? Yula bana

 Bana sala bageste to mwa-senete

 Bana yimba ti kina

4.2 Daniele lombaka mfumu ya basielo kutesa lukanu na bo bilumbu kumi.

(Daniele 1 :9-14)

Tangila bana baverse yai :

9-10 (Kapita ya basielo...tubaka na Daniele nde : “Mono ke tina mfumu boma. Kana nitu na nge kuvanda ve ngolo bonso ya bana ya nkaka, yandi lenda fwa mono.”

11-12 Daniele...vutudilaka yandi nde : “Meka beto bilumbu kumi. Pesa beto kaka ndunda ti masa ya kunwa.

13 Na nima, tala nitu na beto ti nitu ya bana yina ke dia madia ya mfumu. Ebuna nge ta zaba kuzenga mutindu nge ta mona beto.”

14 Yo yina, kapita ndimaka kumeka bo bilumbu kumi.

? Yula bana

 Bana sala bageste to mwa-senete

 Bana yimba ti kina

4.3 Nzambi nungisaka bo na mambu yina, ti Yandi sakumunaka bo na kulonguka na bo.

Tangila bana : Daniele 1 :15-20

15-16 Na nima ya bilumbu kumi, bo lutaka bana yonso na kitoko ti na ngolo. Yo yina, kapita ndimaka kupesa bo kaka madia na bo.

17 ...Nzambi pesaka bo ngangu kulonguka mbote, ti mayele ya kuzaba mutindu ya kusala. Yandi pesaka Daniele mpi mayele kutendula bandosi.

18 Ntangu bamvula tatu me lunga, kapita nataka bana-bakala yonso na ntwala ya mfumu.

19 Mfumu... monaka bo kuluta bana ya nkaka na mayele. Yo yina, yandi tulaka bo kusala na nzo na yandi.

20 Na konso mambu ya mfumu vandaka kuyula bo, yandi monaka nde mayele na bo me luta mbala kumi mayele ya banganga-ngombo ti ya banganga-nkisi yonso na kimfumu na yandi.

? Yula bana

 Bana sala bageste to mwa-senete

 Bana yimba ti kina

>|< Kumanisa Malongi :

Nzambi pesaka Daniele kikesa kubuya madia ya ntotila, yina landaka ve bansiku ya Nzambi me pesa bantu na yandi. Nzambi sadisaka yandi kutuba na luzitu ti na mayele. Nzambi sadisaka yandi ti banduku na yandi kulonguka mbote. Kieleka, Yandi sakumunaka bo.

Devoir sambu na bakristo :

Nzambi ta sadisa beto bakristo mpi, kana beto zenga na ntima yonso kulanda Yandi. Mwana mukristo, keti nge me zenga na ntima kulanda Yesu na konso sika ya nge kele ?

♥ Verse ya kulonguka :

Bana tuba verse mbala zole fraze na fraze na nima ya nge, moniteur. Na nima bo tula diboko na ntwala bonso bo ke buya, bo tuba yo mbala 2 diaka. Na nsuka bo tula maboko zole bonso bo ke buya, bo bula makulu ti tuba yo mbala zole diaka.

Nkunga ya kwenda nzila mosi ti leso :

Daniele Sambaka Mingi Vs.1

✚ Invitation sambu na bo ya me yamba Yesu ntete ve :

Kubalula ntima na Yesu mpi ke lomba nde nge zenga na ntima kulanda Yandi. Kana nge kuwa nde Mpeve ya Nzambi ke benda nge, nge mpi fweti sala parti na nge. Balula ntima. Yai ke zola tuba nde nge zola kubika masumu, ti yantika kulanda Yandi. Kana nge bakisa nde Yesu kele Mwana ya Nzambi tindaka, nde Yandi fwaka na zulu ya kulunsi sambu na mbi ya nge me sala, nde Yandi telamaka na lufwa, nge lenda binga zina na Yandi. Yandi ta pesa nge moyo ya mpa.

NSUKA YA LESO 4

 Kana ntangu lunga, longa mikanda ya Bible ndambu-ndambu. Bangindu kele na p. 43.



Leso 4

***Daniele zengaka na nsi ya ntima
nde :***

***« Mono lenda dia ve madia to
kunwa vinu ya ntotila.***

***Yina ta kumisa mono mvindu na
bansiku na beto »...***

Daniele 1 :8a

LESO 5—Daniele vandaka na kikesa kusosa ngangu ya Nzambi kaka, nkwa ya mayele yonso.

Leso ke monika na Daniele 2.

I. PREPARASIO YA MONITEUR

🕒 Kikuma ya Leso :

Bana ta sosa ngangu na Nzambi kaka, sambu bo ta bakisa nde Yandi zaba mambu yonso. Yo yina, Yandi lunga songa beto konso mambu ya beto ke na mfunu ya kuzaba. Bo ta buya kusosa ngangu na nzila ya banganga ngombo to mazi.

♥ Verse ya Kulonguka :

“Lukumu na Nge Nzambi tii kuna. Nge kele mayele mingiNge ke tulaka bamfumu ti ke katula bo. Nge ke songa mambu ya kinsweki ya muntu lenda zaba ve... Daniele 2 :20-22

🔊 Bankunga ya kwenda nzila mosi ti leso :

Daniele Sambaka Mingi Vs 1 & 2
Kikesa Kele

II. REVISIO

📖 Kuyindula diaka baleso me luta :

Daniele vandaka Muyuda ya zolaka Nzambi mingi. Mfumu ya Babilonia kwisaka kunwanisa bwala na yandi, Yeruzalemi. Yandi kangaka Daniele ti nataka yandi ntama na Babilonia kuvanda mpika. Kansi Daniele zengaka na ntima nde yandi ta landa kaka Nzambi. Mfumu zolaka kupesa yandi madia na mpila na bo, na mpila ya landaka ve bansiku ya bisambu ya Bayuda. Daniele lombaka nde bo pesa yandi kaka ndunda ti masa. Nzambi sakumunaka yandi na nitu ya ngolo. Bo longaka yandi ndinga ti mayele ya Babilonia, ti Nzambi sadisaka Daniele kulonguka. Yandi lutaka bantu yonso na mayele.

➡ Kuyantika Leso :

Histoire : Mwana zina ya Koko vandaka na mawa sambu foto mosi me vila. Yandi yantika kudyula : “Nani bakaka yo ?” Yandi yindulaka ti yindulaka. Na nsuka, yandi kwendaka na nganga ngombo mosi kuyula makambu yina. Nganga ngombo lombaka yandi kufuta mbongo ti bima ya nkaka. Koko futaka bima yonso, ebuna nganga ngombo kwendaka kuyula bampeve na yandi. Yandi tubaka

nde nduku ya Koko, zina ya Kwesi muntu me baka foto yina.

Koko wilaka Kwesi makasi mingi. Yandi fundaka Kwesi. Kwesi tubaka nde yandi zabaka mambu yina ve. Koko ti Kwesi, bo vandaka kunwana na bandinga mingi tii kinduku na bo manaka.

Na nima ya bilumbu, Koko kangulaka mukanda mosi sambu na kutanga yo. A ! Foto yina bwaka na ntoto. Nswalu, yandi bambukaka nde yandi mosi me tula yo na kati ya mukanda yina. Foto na yandi me monika, kansi Koko vandaka na kiese ve.

Yandi me bebisa mbongo mingi mpamba na nganga ngombo. Yandi me fwaka kinduku ti Kwesi, ti yandi me vanda bonso maladi sambu na makasi ti kumenga na yandi. Ntangu yina, Koko bambukaka bandinga ya Bible, na mukanda ya Daniele:

“Mambu ya mutindu yai ya kinsweki, kaka Nzambi ya zulu lenda kusonga yo.” (Daniele 2 :28)

A ! Mbote kana yandi sosaka Nzambi kubambukisa yandi wapi yandi me tula foto ! Mbote kana yandi me kwenda ve na nganga ngombo yina ! Mbote yandi bakisaka nde, Nzambi yina zaba mambu yonso, Yandi zola sadisa bana na Yandi.

Na leso na beto bubuyai, beto ta mona nde, Daniele mpi vandaka na mfunu kuzaba mambu ya kinsweki. Nki mutindu yandi lenda zaba mambu yina ? Nki lenda sadisa Daniele na mambu yai ?

III. KULONGA LESO YAI

🏠 Malongi ya nene ya leso yai (developpement) na banti ya malongi 4 :

5.1 Bamazisiene ya Babilonia monaka ve mpila kusonga mfumu ndosi na yandi ti disongidila na yo.

📖 Tangila bana : Daniele 2 :1-12

1-2 ...Mfumu Nebu lalaka ndosi. Yo pesaka yandi mpasi mingi. Yo yina, yandi bingaka bakonseye na yandi yonso : banganga-ngombo, banganga-nkisi, bantu yina ke tubaka mambu ta kwisa na ntwala...sambu bo tendula yandi ndosi yina....

3 Yandi songaka bo nde : “Mono me lala ndosi mosi ke pesa mono mpasi...”

4 Bo vutulaka yandi nde : “Mfumu...Songa beto ndosi na nge, ebuna beto ta tendula yo.”

5 Ntotila tubaka na bo nde : “...kana beno songa mono ve ndosi **ti** disongidila na yo, mono ta songa bo kuzenga beno bitini-bitini....”

6 Kansi kana beno songa mono yo, mono ta pesa beno bakado ti lukumu...”

7,11 Bakonseye tubaka diaka nde : “Mfumu pardo, kana nge songa beto ndosi yango, beto ta zaba kutendula yo. Pardo, mambu ya nge ke lombaka beto kele mpasi mingi. Ata muntu mosi ve lenda sala yo...”

12 Ebuna mfumu waka makasi mingi. Yandi tubaka nde bo fwa bantu yonso ya mayele ya nsi ya Babilonia.

? Yula bana

 **Bana sala bageste to mwa-senete**

 **Bana yimba ti kina**

5.2 Bu Daniele waka mambu yina, yandi sosaka Nzambi, ti Yandi songaka Daniele ndosi yina.

 **Tangila bana : Daniele 2 :13-23**

14-15Daniele yulaka : “Sambu na nki mfumu me zengila bantu ndola ya ngolo mutindu yai ? Kapita telaka Daniele mambu yonso.

16 Daniele kwendaka nswalu kulomba nzila ya mfumu kana yandi pesa yandi mwa-ntangu.

17-18 Daniele vutukaka na nzo. Yandi songaka mambu yonso na banduku na yandi. Yandi nde : “Beto samba Nzambi kutendudila beto ndosi yina.

19-21 Kilumbu yo yina... Nzambi songaka Daniele ndosi yina. Yo yina, Daniele kumisaka Nzambi nde : “Lukumu na nge Nzambi tii kuna. Nge kele mayele mingi ti ngolo mingi.... Nge ke tulaka bamfumu ti ke katula bo....

22- 23 Nge ke songaka mambu ya kinsweki ya muntu lenda zaba ve. Nzambi, mono ke pesa Nge mersi ti lukumu. Nge me pesa mono mayele ti ngolo. Nge me ndima mambu ya beto lombaka. Nge me songa mono nki beto fweti tuba na ntotila.”

? Yula bana

 **Bana sala bageste to mwa-senete**

 **Bana yimba ti kina**

5.3 Daniele songaka ndosi na mfumu ti tendulaka yo. Mfumu monaka visio ya songaka nde bimfumu ya nkaka ta landa yina ya Babilonia. Kansi na nsuka Nzambi ta yala mvu ya mvu.

 **Tangila bana : Daniele 2 :24-45**

24-27Nswalu bo nataka Daniele na ntotila. Daniele nde : “Mfumu, ata muntu mosi ya mayele, ata nganga-nkisi, ata nganga-ngombo, bo lenda songa nge mambu yai ve.

28 Mambu ya mutindu yai ya kinsweki, kaka Nzambi ya zulu lenda kusonga yo. Yandi me songa nge, mfumu, mambu ya ta kwisa...

31-33 Nge vandaka kumona kiteki mosi ...ya nda. Ntu na yo vandaka na kusala na wolo-wolo, nitu na nsi na bibende ya nkaka ya ntalu. Makulu na yo yonso, ndambu na kibende, ndambu na ntoto.

34 Ditadi ya nene katukaka yo mosi na ngumba mosi, yo kwisaka kubwila kiteki na makulu na yo. Yo panzaka yo.

35-36 Na mbala mosi kiteki yonso bukanaka kitini-kitini... Kansi ditadi yina bwilaka kiteki, yo kumaka ngumba ya nene... Yo yai ndosi ya nge lalaka, mfumu. Ntangu yai, wa disongidila na yo.

37-38 Mfumu Nzambi ya zulu tulaka nge mfumu, Yandi pesaka nge kimfumu, ngolo ti lukumu. Yandi tulaka nge kuyala bantu yonso. Ntu yina ya wolo kele nge, mfumu.

39-40 Na nima ya kimfumu na nge, kimfumu ya nkaka ta vanda. Na nima, kimfumu ya nkaka ta vanda...

44-45 Na nsuka, Nzambi ya zulu ta tula Mfumu mosi yina ta yala tii kuna...

? Yula bana

 **Bana sala bageste to mwa-senete**

 **Bana yimba ti kina**

5.4 Mfumu ndimaka bandinga ya Daniele. Yandi pesaka lukumu na Nzambi, ti pesaka Daniele sika ya lukumu.

 Tangila bana : Daniele 2 :46-49

46-47 Ntangu yai, ntotila...fukamaka na ntuala ya Daniele.... Yandi songaka Daniele nde :

“Nzambi na nge me luta banzambi yonso ya nene. Yandi kele Mfumu ya bamfumu...”

48 Nebu kumisaka Daniele muntu ya lukumu. Yandi pesaka yandi bakado mingi ya kitoko...

? Yula bana **Bana sala bageste to mwa-senete** **Bana yimba ti kina****>|< Kumanisa Malongi :**

Daniele sosaka Nzambi kuzaba ndosi ya mfumu na yandi, ti disongidila na yo. Ndosi songaka mambu ya bimfumu ya ntoto. Mbala mingi, bamfumu ya nene bonso ya Babilonia monaka bonso bo vandaka na kiyeka yonso. Bonso bo vandaka Nzambi ya ta yala mvu ya mvu. Nzambi songaka Daniele nde ndosi yina songaka nde kele Nzambi ke pesa kiyeka na bantu. Bimfumu ya ntoto ta vanda mingi, kansi na nsuka, Nzambi Yandi mosi ta yala, Ntotila ya bantotila tii kuna.

 Devoir sambu na bakristo :

Beto bakristo vanda bantu ya ke sosa mayele ya Nzambi, kansi ya bamazisiene ve. Beto zaba nde Nzambi zaba mambu yonso, ata mambu ya ta kwisa na nima. Na mposo yai, beto sosa mayele kaka na Yandi.

 Verse ya Kulonguka :

Bana tuba verse mbala zole fraze na fraze na nima ya nge, moniteur. Kutuba yo mbala zole diaka, konso ntangu bo tuba 'Nzambi' to 'Nge', bo songa diboko na zulu. Na mbala zole ya nsuka, bo tuba 'mayele' na ndinga ya ngolo ti 'kinsweki' na ndinga ya pima.

 Bankunga ya kwenda nzila mosi ti leso :

Daniele Sambaka Mingi Vs 1 & 2
Kikesa Kele

 Invitation sambu na bo ya me yamba Yesu ntete ve :

Kana nge me yamba Yesu ntete ve bonso Mvulusi na nge, Nzambi zola nge kubakisa mambu yai :

Kukonda Yesu, nge lenda guluka ve. Kukonda Yesu, nge lenda kwenda ve na bwala ya Nzambi. Kukonda Yesu, nge lenda vanda na kinduku ve ti Nzambi.

Nge ke na mfunu na Yandi. Yandi zola nge. Yandi fwaka na zulu ya kulunsi sambu na kugulusa nge na masumu. Yandi me telama na lufwa, ti Yandi kele na moyo bubu. Yandi lenda gulusa nge kana nge ta binga zina na Yandi.

Kana nge me binga Yandi ntete ve kulomba Yandi kugulusa nge, keti nge ta binga Yandi bubuyai ? Mono ta vanda awa na nima ya classe, ti mono ta vanda na kiese kusadisa konso nani zola ndima Yesu bubuyai.

Nkunga ya nsuka : Kikesa Kele

NSUKA YA LESO 5

 Kana ntangu lunga, longa mikanda ya Bible ndambu-ndambu. Bangindu kele na p. 43.



Leso 5

Daniele
sosaka
Nzambi
kusonga
yandi
kinsweki ya
ndosi ya
mfumu.
Nzambi
wilaka yandi
ti songaka
yandi
mambu ya
muntu lenda
zaba ve.

*“Lukumu na Nge Nzambi tii
kuna. Nge kele mayele mingi
Nge...ke tulaka bamfumu ti ke
katula bo....*

*Nge...ke songa mambu ya kinsweki
ya muntu lenda zaba ve...*

Daniele 2 :20-22

LESO 6—Banduku ya Daniele vandaka na kikesa kubuya bisambu ya kiteki.

Leso me monika na Daniele 3.

I. PREPARASIO SAMBU NA MONITEUR-

☉ Kikuma ya Leso :

Bana ta buya kusamba to kusosa banzambi ya nkaka. Bo ta pesa luzolo na bo yonso ti bisambu na bo yonso na Mfumu Nzambi Mpungu kaka, sambu bo ta bakisa nde Nzambi zola ti sosa bisambu na beto, ti kaka Yandi ke lunga kubaka yo, sambu kaka Yandi me ganga beto ti me pesa beto moyo.

♥ Verse ya Kulunguka :

Mono kele Mfumu Nzambi...

Mono ta pesa lukumu na Mono ve na nzambi ya nkaka, ata na biteki mpi ve ! Yezaya 42 :8

👁 Bankunga ya kwenda nzila mosi ti leso :

Banzambi ya nkaka

Nani kele ngolo ?

II. REVISIO

† Kuyindula diaka baleso me luta :

Nzambi pesaka Daniele makabu ya kutendula nki ? (Bandosi)

Daniele songaka nani ndosi na yandi ? (Mfumu ya nene ya Baylonia, Nebu)

Ndosi yina songaka nde Kimfumu ya nani ta yala tii kuna ? (Kimfumu ya Nzambi)

III. KULONGA LESO YAI

➔ Kuyantika Leso :

Bakristo mingi samba Nzambi kana yonso ke salama na mpila ya mbote na luzingu na bo. Kansi kana ntangu ya mpasi kwisa, aii ! Kana bo mona nde Nzambi ke pesa mvutu nswalu ve ya bisambu na bo, bo yantika kusosa bampeve ya nkaka kusadisa bo.

Na leso ya bubu, beto ta mona bantu ya vandaka kwikama kusamba kaka Nzambi, ata ntangu ya mpasi vandaka na ntwala na bo.

🏠 Malongi ya nene ya leso yai (developpement) na banti ya malongi 4 :

6.1 Mfumu tedimisaka kiteki ti songaka nde bantu yonso samba yo. Ndola kana muntu buya : lufwa na tiya.

📖 Tangila bana : Daniele 3 :1-6

1-2 Mfumu Nebu salaka kiteki mosi ti tedimisaka yo. Yandi bingaka bantu yonso kukwisa kusala fete ya kiteki ya yandi...

3 Bo yonso kwisaka sambu na fete yango. Bo telamaka na ntwala ya kiteki...

4-5 Muntu mosi vandaka kubula tango tubaka na ndinga ya ngolo nde : “Beno yonso ! Ntangu beno ta wa miziki, beno fweti fukama ti sambila kiteki ya mfumu me tedimisa.

6 Konso muntu yina ta fukama ve to sambila ve kiteki, bo ta losa yandi na furu ya tiya.”

? Yula bana

🏠 Bana sala bageste to mwa-senete

👁 Bana yimba ti kina

6.2 Banduku ya Daniele buyaka kusamba kiteki. Yo yina, bantu fundaka bo na mfumu. Yandi songaka bo diaka kusamba yo, kansi bo buyaka diaka.

📖 Tangila bana : Daniele 3 :7-18

7 Ebuna ntangu bantu waka miziki, bo yonso fukamaka, bo sambilaka kiteki...

8-11 Na ntangu yo yina, bantu ya nkaka kwendaka kufunda Bayuda na mfumu. Bo songaka yandi nde : “Bayuda yai Shadraki, Meshaki ti Abedi-Nego, bo me zitisa ve nsiku na nge mfumu.... »

13-14 Ntotila Nabu waka makasi mingi. Yandi nde : “Beno kwisa kunata bo awa na mono !” Ntangu bo kumaka, yandi yulaka bo nde : “Keti ya kieleka beno ke buya kufukama na ntwala ya kiteki ya mono ?

15 Ntangu yai, kana beno wa diaka miziki, fukama, sambila kiteki. Kana beno buya, bo ta losa beno na furu ya tiya. Keti beno ke yindula nde Nzambi lenda gulusa beno ?”

16-17 Bo vutulaka nde : “Mfumu, Nzambi yina ya beto ke sadilaka, kana Yandi zola gulusa beto na tiya ti na maboko na nge, Yandi ta

gulusa beto kaka.

18 Kansi ata Yandi gulusa beto ve, mfumu, zaba nde beto ta fukama ve na ntwala ya kiteki yina...”

? Yula bana

 Bana sala bageste to mwa-senete

 Bana yimba ti kina

6.3 Na makasi, Mfumu songaka basoda kulosa bo na tiya ya ngolo. Kansi na nima, yandi monaka bantu iya na tiya, kutambula. Yandi katulaka bo ti monaka nde tiya me sala bo kima ve.

 **Tangila bana : Daniele 3 :19-27**

19 Ntangu yai ilungi ya ntotila kumaka mbwaki. Yandi wilaka bo makasi mingi. Yandi songaka basielo na yandi nde : “Tula tiya mingi mbala nsambwadi !”

20 Yandi songaka mpi basoda na yandi nde : “Kanga bana yai tatu bansinga. Losa bo na kati ya tiya...”

21-22 Basoda kangaka bo bansinga ti bilele na bo yonso ya bo vandaka na yo na nitu. Bo losaka bo na furu... Tiya lutanaka mingi...

23 Shadraki, Meshaki ti Abedi-Nego bwaka na kati-kati ya tiya.

24 Ntangu yina, mfumu yitukaka. Yandi telemaka na mbala mosi kuyula basielo na yandi nde : “Keti beno me losa ve na tiya bantu tatu ya beto kangaka bansinga ?” Basielo na yandi vutulaka nde : “E mfumu, yo kele mpidina.”

25 Mfumu nde : “Ebuna, sambu na nki mono ke mona bantu iya ke tambula-tambula na kati ya tiya ? Bo kele ya kukanga ve, bo mpi ke monika ve bo ke wa mpasi, ebuna muntu ya iya ke monika bonso wanzio.”

26 Ebuna mfumu bingaka : “Shadraki, Meshaki, Abedi-Nego, beno bantu ya Nzambi-Mpungu, beno kwisa kubasika !” Nswalu bo kwisaka kubasika.

27 Bantu yonso ya nene ya mfumu kwisaka kisika mosi kutala bantu yina ya kupiaka ve tiya. Bansuki na bo ti bilele na bo piaka tiya

ve; bo vandaka kubasika mpi ata nsudi ya tiya ve.

? Yula bana

 Bana sala bageste to mwa-senete

 Bana yimba ti kina

6.4 Mfumu kumisaka Nzambi sambu kaka Yandi kele sala kimpa mutindu yina.

 **Tangila bana : Daniele 3 :28-33**

28 Ntotila tubaka nde : “Lukumu na Nzambi ! Yandi me tinda wanzio na Yandi kugulusa bantu yai ke sambaka Yandi....

30 Ebuna mfumu pesaka Shadraki, Meshaki ti Abedi-Nego bisalu ya kuluta lukumu...

31-32 Mfumu tindaka ndinga na bantu yonso nde : «Mono ke tubila beno nde Nzambi-Mpungu, Yandi ke sala bidimbu ya nene mpenza ! Nzambi kele mfumu tii kuna. Kimfumu na Yandi mpi ta mana ve. »

? Yula bana

 Bana sala bageste to mwa-senete

 Bana yimba ti kina

>|< Kumanisa Malongi :

Shadraki, Meshaki, ti Abed-Nego me zenga na ntima kulanda kaka Nzambi. Yo yina, bo buyaka kusamba kiteki. Ndola vandaka ngolo—bo losa bo na tiya ya makasi. Kansi Nzambi me luta ngolo ya tiya yina. Yandi tindaka wanzio kuvanda ti bo na kati ya tiya, ti Yandi basisaka bo na mpasi yina.



Devoir sambu na bakristo :

Kana nge zaba Yesu, mambu mingi ta benda nge kusambila banzambi ya nkaka. Banzambi ya nkaka lunga ve kubaka bisambu ti luzolo na beto, sambu bo kele ve Nzambi yina gangaka beto ti pesaka beto moyo. Keti nge ta zenga kuzola ti kusamba Mfumu Nzambi Mpungu, Yandi kaka, yantika mposho yai ?



Verse ya Kulonguka :

Bana tuba verse mbala zole na nima ya nge, moniteur, Na nima, bo yika bageste ti tula yo

nkunga. Bo yimba yo, na nima bo tuba yo mbala zole diaka

 **Bankunga ya kwenda nzila mosi ti leso :**

Banzambi ya nkaka
Nani kele ngolo ?

 **Invitation sambu na bo ya me yamba Yesu ntete ve :**

Mbala ya nkaka nge zaba Yesu ntete ve. Yandi zola nge kuvanda na fami na Yandi. Kana nge me ndima Yandi ntete ve, Yesu ke kinga nge kuzenga mambu yina. Bubuyai, keti nge ta tuba “Ee” na Yandi ? Kana nge ke na mfunu ya lusadisu na mambu yina, kaka kusonga mono na nima ya classe, to konso ntangu nge ta mona mono na mposho yai. Mono ta vanda na kiese ya mingi kusadisa nge kukangula ntima na nge na Yesu.

NSUKA YA LESO 6

 Kana ntangu lunga, longa mikanda ya Bible ndambu-ndambu. Bangindu kele na p. 43.



Leso 6

Banduku
ya Daniele
zolaka
Nzambi.
Bo
buyaka
kusamba
kiteki ya
Mfumu.
Yo yina,
bo losaka
bo na
furu ya
makasi
mingi.
Kansi
Nzambi
kebaka bo
kuna
sambu
tiya
kusimba
bo ve.

***Mono kele Mfumu Nzambi.
Mono ta pesa lukumu na
Mono ve na nzambi ya nkaka,
Ata na biteki mpi ve !***

Yezaya 42 :8

Leso 7—Mfumu Nebu zwaka ndola sambu na lulendo na yandi, kansi Nzambi wilaka yandi mawa ntangu yandi kudikulumusaka.

Leso ke monika na Daniele 4.

I. PREPARASIO SAMBU NA MONITEUR-

🕒 Kikuma ya Leso :

Bana bakisa nde lulendo lunga na beto bantu ve, sambu beto kele Nzambi ve.

♥ Verse ya Kulunguka :

*Beno vila ve nde Mfumu Nzambi kele Nzambi !
Yandi salaka beto, beto mosi ve. Beto kele bantu na Yandi, mameme na Yandi. Bankunga 100 :3*

🔊 Bankunga ya kwenda nzila mosi ti leso :

Daniele Sambaka Mingi Vs. 1 & 2
Mo' Ta Kwisa na Nzambi na Lulendo Ve

II. REVISIO

† Kuyindula diaka baleso me luta :

Daniele me kuma mpika na nsi ya Babilonia. Mfumu kuna vandaka ntu-ngolo. Yandi me mona nde Nzambi songaka serviteur na Yandi Daniele bandosi na yandi, ata bamazisien na yandi vandaka ve na mpila kuzaba yo. Yandi me mona nde Nzambi lundaka baserviteur na yandi, ata bo losaka bo na tiya ya nene. Na yina yonso, yandi pesaka Nzambi lukumu.

III. KULONGA LESO YAI

➔ Kuyantika Leso :

Kansi ata mfumu Nebu me mona bima yina yonso, yandi vandaka kunwana na ntima nani vandaka Nzambi kibeni. Yandi yindulaka ntangu ya nkaka nde yandi mosi vandaka Nzambi. Hmm. Yai ta vanda nki mutindu ?

🏠 Malongi ya nene ya leso yai (developpement) na banti ya malongi 4 :

7.1 Mfumu Nebu lalaka ndosi ya zole ya bamagicien lendaka ve kutendula. Yo yina, yandi bingaka diaka Daniele.

📖 Tangila bana : Daniele 4 :1-15

Mfumu Nebu : 2-4...*Mono lalaka ndosi mosi ya boma. Bantu yonso ya mayele, banganga-ngombo, bo kukaka ve kutendudila mono yo.*

5-8...*Daniele kwisaka, ebuna mono telaka yandi ndosi ya mono. Mono monaka nti mosi ya nda ya vandaka kuyela kaka, na mpila nde bantu yonso kumona yo.*

10-12 ...*Mono monaka wanzio me katuka na zulu. Yandi nde : « Bwisa nti yai. Zenga balutangu na yo, kansi kitini ya nti yina me bikala, bikisa yo mpidina. Kitini ya nti yina kele bonso muntu. Malulu kubwila muntu yina, yandi zinga bonso bambisi na matiti.*

13-14 *Yandi ta vanda diaka ve na ntima ya kimuntu, kansi na ntima bonso mbisi bamvula 7. Mpidina bantu yonso fweti zaba nde Nzambi-Mpungu ke yalaka bamfumu yonso ya nsi-ntoto.*

? Yula bana

🏠 Bana sala bageste to mwa-senete

🔊 Bana yimba ti kina

7.2 Ntendula pesaka Daniele mpasi, kansi Nzambi pesaka yandi kikesa kutendula yo na mfumu.

📖 Tangila bana : Daniele 4 :16-24

16-19 *Ntangi yai, Daniele monaka mpasi mpenza. Yandi monaka kima ya kutuba ve. Mfumu Nebu nde : 'Kuwa boma ve.' Daniele nde : 'Mfumu, a kana ndosi ti disongidila na yo vandaka sambu na bambeni na nge ! Mfumu, nti yina kele nge.*

21 *Nzambi-Mpungu me songa nde mambu yai ta bwila nge. Mpidina nge ta ndima nde Nzambi-Mpungu ke yalaka bamfumu yonso ya nsi-ntoto.*

? Yula bana

🏠 Bana sala bageste to mwa-senete

🔊 Bana yimba ti kina

7.3 Mvula mosi na nima, Mfumu salaka lulendo kutuba nde yandi mosi me tunga Babilone na ngolo na yandi. Yo yina, zuzema simbaka yandi mpila Daniele me tuba. Yandi salaka bamvula 7 kuzinga bonso mbisi.

 Tangila bana : Daniele 4 :25-30

Mfumu ya Babilonia nde :

25-27 Mambu yai yonso bwilaka mono. Bangonda 12 lutaka. Ntangu mono vandaka kutambula, mono tubaka nde : 'A bwala Babilone kele nene ! Mono muntu tungaka yo na ngolo na mono mosi...

28 Ntangu mono me manisa ntete ve kutuba, mono waka ndinga na zulu nde : « Ntangu yai, kimfumu na nge ke mana.

29 Bo ta kula nge na kati ya bantu. Nge ta zinga kisika mosi ti bambisi ya mfinda. Nge ta dia matiti bonso bambisi ya mfinda bamvula 7, tii kuna nge ta ndima nde Nzambi-Mpungu ke yalaka bamfumu yonso ya nsi-ntoto...

30 Nswalu mambu yina bwaka. Nsuki na mono kumaka nda-nda bonso mansala ya ndeke. Manzungulu kumaka mpi nda-nda bonso ndeke.

? Yula bana **Bana sala bageste to mwa-senete** **Bana yimba ti kina**

7.4 Na nima ya bamvula 7, mayele ya kimuntu vutukaka na Nebu, ti yandi ndimaka nde Nzambi kele Nzambi Mpungu mvu ya mvu. Ebuna Nzambi vutulaka yandi na kimfumu na yandi.

 Tangila bana : Daniele 4 :31-34

Na nima y bamvula, mono talaka na zulu. Mono zabaka nde mono me kuma diaka muntu. Mono tubaka nde : « Nge Nzambi-Mpungu, Nge Nzambi ke zingaka tii kuna. Mono ke pesa Nge mersi, ke kumisa Nge. Nge mosi ta yalaka ntangu yonso. Kimfumu na Nge ta mana ve tii kuna.

34 Ntangu yai, mono ke samba Mfumu ya zulu. Mambu yonso ya Yandi ke sala kele ya kieleka ti ya mbote. Yandi ke kulumusaka bantu yina ke tulaka lulendo.

? Yula bana **Bana sala bageste to mwa-senete** **Bana yimba ti kina**

>|< Kumanisa Malongi :

Mfumu ya Babilonia vandaka ntu-ngolo. Yandi zolaka kumonika bonso Nzambi. Nzambi pesaka yandi atasio na ndosi, nki ta salama kana yandi tula lulendo. Kansi na nima, yandi salaka lulendo kutuba nde yandi me sala kimfumu ya Babilonia na ngolo na yandi mosi, kuzaba ve nde Nzambi me pesa yandi yo. Mbala mosi, ndola ya Nzambi simbaka yandi mutindu Yandi tubaka. Mfumu yai ya nene kumaka kuyindula ti kusala bonso mbisi. Nsoni ! Nzambi kulumusaka yandi ngolo ! Kansi na nima ya bamvula 7, na nlemvo ya Nzambi, Yandi vutulaka yandi na kimuntu ti na kimfumu. Mbote beto zaba nde beto kele bantu, ti Nzambi Ngangi ya me sala beto.

 Devoir sambu na bakristo :

Bana bakristo, beto tina lulendo. Beto pesa Nzambi sika ya nene, ya ntete na luzingu na beto. Yandi lunga na kubaka sika yina.

 Verse ya Kulonguka :

Bana tuba verse mbala 2 fraze na fraze na nima ya nge, moniteur. Bo yika bageste ti tuba yo mbala 2 diaka. Mbala zole ya nsuka, nge moniteur yantika verse ti bana manisa yo.

 Nkunga ya kwenda nzila mosi ti leso :

Mo' Ta Kwisa na Nzambi na Lulendo Ve

 Invitation sambu na bo ya me yamba Yesu ntete ve :

Na nsuka mono ke tuba na beno ya me balula ntima na Yesu ntete ve. Ketu lulendo ke kanga nge nzila kuyamba Yandi ? Ketu nge ke mona bonso nge kele mbote, nge ke na mfunu na Yandi ve ?

Kana mpidina, zaba nde beto kele bankwa-masumu na ntuala na Yandi. Kuwa profete Yezaya (64 :5) : *Beto yonso, beto kele bonso bantu ya mvindu. Ata mambu ya mbote ya beto ke salaka, yo kele kaka bonso bilele ya mvindu...* Kaka muntu ya lenda sadisa probleme yai kele Yesu Kristo. Na lufwa na Yandi, Yandi bakaka masumu na beto sambu Yandi lenda pesa beto lunungu na Yandi. O, kuinga diaka ve. Mbote kubalula ntima bubu, kubinga zina na Yandi bubuyai, Yandi gulusa nge.

NSUKA YA LESO 7

 Kana ntangu lunga, longa mikanda ya Bible ndambu-ndambu. Bangindu kele na p. 43.

Leso 7
 Nzambi
 kulumu-
 saka
 Mfumu
 Nebu
 sambu
 na
 lulendo
 na
 yandi.
 Bamvula
 7, yandi
 zingaka
 bonso
 mbisi na
 mfinda.



***Benovila ve nde Mfumu
 Nzambi kele Nzambi !
 Yandi salaka beto, beto mosi ve.
 Beto kele bantu na Yandi,
 mameme na Yandi.***

Bankunga 100 :3

Leso 8. Mfumu Baltazare bwaka na lulendo, ti Nzambi manisaka kimfumu na yandi.

Leso ke monika na Daniele 5

I. PREPARASIO SAMBU NA MONITEUR-

☉ Kikuma ya Leso :

(Diaka) Bana bakisa nde lulendo lunga na beto bantu ve, sambu beto kele Nzambi ve. Bo ta vanda na kikesa bonso bantu ya Nzambi, kansi bo ta tula lulendo ve.

♥ Verse ya Kulonguka : Beto baka diaka---

(Diaka) Beno vila ve nde Mfumu Nzambi kele Nzambi ! Yandi salaka beto, beto mosi ve. Beto kele bantu na Yandi, mameme na Yandi.
Bankunga 100 :3

👤 Bankunga ya kwenda nzila mosi ti leso :

Daniele Sambaka Mingi Vs. 1 & 2
Mo' Ta Kwisa na Nzambi na Lulendo Ve

II. REVISIO

† Kuyindula diaka baleso me luta :

Beto me mona lulendo ya mfumu ya Babilonia mosi, Mfumu Nabu. Yandi tubaka nde yandi mosi me sala bwala ti kimfumu na yandi. Yo yina, Nzambi kulumusaka yandi, yandi kwendaka na ntoto bonso mbisi. Kansi na nima ya bamvula 7, Nzambi kangulaka mabanza na yandi kubakisa nde yandi Nzambi ve. Ebuna Nzambi vutulaka yandi na kimfumu.

III. KULONGA LESO YAI

➔ Kuyantika Leso :

Na kapu 5 ya mukanda ya Daniele, beto mona nde mfumu ya mpa vandaka kuyala na Babilonia. Mfumu yai vandaka ntekolo ya mfumu ya ntete. Zina na yandi Baltazare. Keti Mfumu Baltazare mpi ta mona probleme ya lulendo ?

🏠 Malongi ya nene ya leso yai (developpement) na banti ya malongi 4 :

8.1 Na lulendo, Mfumu Baltazare salaka fete na yandi, ti yandi sadilaka makopa ti bawolo ya bo me botula na nzo-Nzambi na Yeruzalemi. Yandi sadilaka yo sambu na kumisa banzambi mutindu

na mutindu. Ntangu yina, yandi monaka diboko kusunika na kibaka.

📖 Tangila bana : Daniele 5 :1-6

1-2 Kihumbu mosi, ntotila Baltazare salaka fete mosi ya nene... Yandi songaka bo kunata makopa ti babolo ya bo botulaka na Nzo-Nzambi na Yeruzalemi.

4 Bo yantikaka kuyimba bankunga sambu na kukumisa banzambi na bo ya kiteki.

5-6 Na mbala mosi, bo monaka diboko ya muntu ke sonika na kibaka ya nzo. Ntangu ntotila monaka diboko ke sonika, boma simbaka yandi mingi, ti yandi kumaka kisakasaka. Mabolongo na yandi yantikaka kutekita.

? Yula bana

🏠 Bana sala bageste to mwa-senete

👤 Bana yimba ti kina

8.2 Bamazisien na yandi monaka ve mpila kutendula yo, ebuna bo bingaka Daniele.

📖 Tangila bana : Daniele 5 :7-12

7-9 Yandi tubaka na ndinga ya ngolo nde : « Beno kwenda kubinga banganga ngombo ! Muntu yina ta kuka kutanga bisono yai ti kutendula yo, mono ta lwatisa yandi bilele ya kimfumu. Yandi ta kuma muntu ya tatu na kimfumu na mono. » Bantu yonso ya mayele kwisaka, kansi ata mosi ve kukaka kutanga bisono ti kutendula yo. Yo yina, boma simbaka Baltashazare diaka ya kuluta...

10-12 Mama na yandi kwisaka kukota. Yandi nde : « Kuwa boma ve. Ke na muntu mosi kele kikisa ti mayele mingi kutendula bandosi ti mambu kele mpasi na kuzaba, ti mambu ya kinsweki. Zina na yandi Daniele. Yandi ta songa nge disongidila ya mambu yai. »

? Yula bana

🏠 Bana sala bageste to mwa-senete

👤 Bana yimba ti kina

8.3 Daniele tendulaka nde kusunika yina songaka zuzema ya Nzambi sambu na lulendo ya mfumu. Nzambi ta kabisa kimfumu na yandi,

kupesa ndambu na yo na bantu ya nsi ya Media, ti ndambu na nsi ya Persia.

 **Tangila bana :** Daniele 5 :13-29

13 Bo kwisaka kunata Daniele na mfumu. Ebuna yandi songaka Daniele nde :

14-16 «Mono me wa nde nge ke na mayele, nde nge lenda tendula mambu ya kinsweki. Kana nge tanga bisono yai ti kutendula yo...nge ta kuma muntu ya tatu na kimfumu... »

17 Daniele nde : « Mbote nge kabila bakado na nge na muntu ya nkaka. Kansi mono ta tangila nge mfumu bisono yai ti tendudila nge yo.

18-21 Nzambi-Mpungu tulaka nkaka na nge mfumu. Yandi pesaka yandi lukumu ti ngolo. Kansi yandi kumaka lulendo ti ntu ngolo. Yo yina, Nzambi katulaka yandi na kati ya bantu. Ngindu na yandi kumaka bonso ya mbisi, tii kuna yandi ndimaka nde Nzambi-Mpungu ke yalaka bamfumu yonso.

22-23 Ebuna nge, nge me kudikulumusa ve, ata nge zaba mambu yai yonso. Nge me tula lulendo na Mfumu ya zulu. Nge me sadila makopa ti babolo ya bo botulaka na nzo ya Yandi. Nge me kumisa mpi banzambi ya ke mona ve, ke wa ve, ke zaba mpi kima ve. Kansi nge me buya kukumisa Nzambi.

24 Yo yina, Nzambi me tinda diboko yina kukwisa kusonika mambu yai.

25-28 Mambu ya diboko sonikaka, yo yai : 'Mene, mene, tekele, parisini.' Disongidila na yo, yo yai : Nzambi me sukisa bilumbu ya kimfumu na nge. Yandi me kabisa kimfumu na nge, me pesa yo na maboko ya bantu ya nsi ya Media ti ya Persia. »

29 Nswalu Baltazare...tulaka Daniele muntu ya tatu na kimfumu na yandi.

 **Yula bana**

 **Bana sala bageste to mwa-senete**

 **Bana yimba ti kina**

8.4 Yo bwaka mutindu Daniele tubaka kaka na mpimpa yina. Dariusi, mfumu ya Media, botulaka kimfumu ya Baltazare.

 **Tangila bana :** Daniele 5 :30-6 :1

30 Kilumbu yo yina na mpimpa, bo kwisaka kufwa Baltazare...

6 :1 Ebuna Dariusi, ntotila ya nsi ya Media, botulaka kimfumu...

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Mfumu Baltazare zabaka mpila Nzambi kulumusaka nkaka na yandi, kansi yandi me longuka kima ve. Yandi mpi kwenda kutula lulendo bonso yandi vandaka Nzambi, bonso yandi lenda sala konso mambu yandi zolaka. Kansi Nzambi kulumusaka yandi. Yandi katulaka yandi kimfumu. Yo salamaka kaka sambu na lulendo ya Baltazare.

 **Devoir sambu na bakristo :**

Bana bakristo, beto tina, tina, tina lulendo. Yo ke pesa Nzambi kiese ve.

 **Verse ya Kulonguka : Beto baka diaka---**

Bana tuba verse mbala mosi na nima ya nge, moniteur. Yula nani ke bambuka yo, nani lenda tuba yo yandi mosi. Bana tatu tuba yo. Na nima, tula bana na bandambu zole ti sala competisio.

 **Bankunga ya kwenda nzila mosi ti leso :**

Daniele Sambaka Mingi Vs. 1 & 2
Mo' Ta Kwisa na Nzambi na Lulendo Ve

 **Invitation sambu na bo ya me yamba Yesu ntete ve :**

O bana, kana nge me zenga ntete ve kulanda Yesu, kana nge me tula Yandi kivuvu ve bonso Mvulusi na nge, kupesa ve nzila nde lulendo kukanga nge kuyamba Yandi. Kuyindula nde nge ke na mfunu na Yandi ve, yo kele lulendo ya nene. Nge kele na mfunu na Yandi, sambu nge mosi lenda kudigulusa ve. Kaka Yesu Mwana ya Nzambi lenda gulusa nge. Keti nge zaba nde nge me yamba Yandi ?

NSUKA YA LESO 8

 Kana ntangu lunga, longa mikanda ya Bible ndambu-ndambu. Bangindu kele na p. 43.



Leso 8

Diboko
sonikaka
zuzema
ya
Mfumu
Baltazare
na kibaka
sambu
bantu
kumona
yo.
Yandi
salaka
lulendo.
Yo yina,
Nzambi
katulaka
Kimfumu
na yandi
na
mpimpa
yina.

Beno vila ve nde Mfumu

Nzambi kele Nzambi !

Yandi salaka beto, beto mosi ve.

***Beto kele bantu na Yandi,
mameme na Yandi.***

Bankunga 100 :3

Leso 9 Daniele vandaka na kikesa kusambu ntangu yonso. Yo yina, Nzambi lundaka yandi na dibulu ya bantambu.

Leso ke monika na Daniele 6.

I. PREPARASIO SAMBU NA MONITEUR-

☉ Kikuma ya Leso :

Bana ta vanda na kikesa kusamba ntangu yonso, bisika yonso bo kele, ata konso nani kele ti bo.

♥ Verse ya Kulonguka :

Kansi mono, mono ke lomba Mfumu Nzambi Yandi sadisa mono. Yandi ta gulusa mono.

Mpimpa ti mwini, suka ti nkokila mono ke didilaka Yandi. Yandi ta wa ndinga na mono.

Bankunga 55 :17-18

🔊 Bankunga ya kwenda nzila mosi ti leso :

Daniele Sambaka Mingi
Nzambi Kuwa na Suka

II. REVISIO

† Kuyindula diaka baleso me luta :

Daniele me zenga na ntima nde yandi ta vanda kwikama na Nzambi, ata bambeni me kanga yandi, me kumisa yandi mpika na nsi ya Babylonia. Nki mutindu yandi me songa kwikama na yandi na Nzambi tii ntangu yai ?

(Yandi me buya madia ya mfumu, yandi me buya kusamba kiteki ya mfumu, etc.)

III. KULONGA LESO YAI

➔ Kuyantika Leso :

Histoire : Mwana zina ya Mulandi vandaka na kuvutula matondo na Nzambi konso ntangu na ntwala ya kudia. Yandi zolaka mingi kutonda Nzambi sambu na bampila yonso Nzambi me sakumuna yandi. Ntangu yandi vandaka kudia sikamosi ti bampangi na yandi ya nzo-nkanda, yandi sambaka Nzambi na ntwala ya kudia, bonso vandaka kifu na yandi.

Mulandi salaka mpidina konso lumbu, kansi lumbu mosi, ndambu ya bana yantikaka kuseka yandi.

“Tala yandi, mwana ya ecodim,” bo sekaka. “Ee Mulandi, ntangu nge ke samba, muntu ta yiba madia na nge !”

Mulandi zolaka ve mpila bo sekaka yandi, kansi yandi vutulaka kima ve. Yandi kaka landaka kusamba Nzambi. Kansi lumbu mosi, ntangu yandi vandaka kusamba, mwana mosi bakaka madia na yandi. Na sika na yo, yandi tulaka dikototo mosi ya nene. Yo pesaka Mulandi shok ya nene. Na nima, Mulandi tondaka Nzambi diaka ve sambu na madia na yandi. Bana vandaka kuseka yandi diaka ve, kansi na nsi ya ntima, Mulandi vandaka kiese ve. Yandi vandaka na mawa ti na nsoni.

Mambu bonso yai salamaka na nduku na beto ya Bible, Daniele. Na bahistoire ya beto me mona dezia, Daniele vandaka jeune. Yandi zingaka na mpila mosi ya kwikama na Nzambi luzingu na yandi yonso. Na histoire ya bubu, Daniele me kuma mbuta. Ketu yandi landaka kaka kuvanda na kikesa kusamba Nzambi kukonda nsoni ?

🏠 Malongi ya nene ya leso yai (developpement) na banti ya malongi 4 :

9.1 Baguvernere ya nkaka wilaka Daniele kimpala. Bo sosaka mpila kufunda yandi. Bo pusaka mfumu kutula nsiku ya lenda kanga Daniele.

📖 Tangila bana : Daniele 6:1-10

6:1 Ebuna Dariusi, mfumu ya nsi ya Media, botulaka kimfumu na Babilonia....

2-3 Yandi solaka Daniele kutala kisalu ya bantu ya nkaka sambu mpeve ya vandaka na yandi...

4 Ntama ve, mfumu monaka nde Daniele me luta baguvernere yonso na kusala mbote...

5 Ntangu yai, bantu yina vandaka na nsi ya Daniele, bo sosaka mpila kukanga yandi na mambu ya mbi na kisalu na yandi. Kansi bo kukaka ve.

7-8 Yo yina, bo kwendaka kutuba na mfumu nde : “Mfumu Dariusi, beto zola kupesa nge ngindu yai : Tula nsiku nde bilumbu 30 ya mvimba, ata muntu mosi ve lenda lomba ata kima na konso nzambi, kansi kaka na nge. Muntu yina ta landa nsiku yai ve, bo losa yandi na dibulu ya bantambu.

9-10 ...Mfumu Dariusi salaka mutindu bo tubaka.

? Yula bana

 Bana sala bageste to mwa-senete

 Bana yimba ti kina

9.2 Daniele landaka na kwikama yonso kusamba Nzambi kukonda kubumbana. Yo yina, bantu ya kimpala kwendaka nswalu kufunda yandi na mfumu.

 **Tangila bana : Daniele 6 :11-13**

11 Ntangu Daniele waka nsiku yina, yandi kwendaka na nzo. Na shambre na yandi kuvandaka bafenetre ke tala na ndambu ya Yeruzalemi. Daniele vandaka na kifu ya kukangula bafenetre yina, ti kufukama kusamba Nzambi mbala tatu konso kilumbu. Na kilumbu yai mpi, yandi salaka mutindu mosi.

12 Bambeni na yandi monaka yandi kusamba Nzambi ngolo.

13-14 Ebuna bo kwendaka kufunda yandi na mfumu nde : “Daniele ke zitisa nge ve, mfumu. Yandi ke samba kaka Nzambi na yandi mbala tatu konso kilumbu.”

? Yula bana

 Bana sala bageste to mwa-senete

 Bana yimba ti kina

9.3 Mfumu vandaka na kiese ve, kansi sambu yandi me sonika nsiku yina, bo losaka Daniele na dibulu ya bantambu.

 **Tangila bana : Daniele 6 :15-18**

15 Ntangu ntotila waka mambu yai, yandi monaka mpasi mingi na ntima, kansi yandi songaka bantu na yandi kukwenda kusimba Daniele, kulosa yandi na dibulu ya bantambu. Yandi songaka Daniele nde : “Nzambi na nge yina nge ke sadilaka ntangu yonso, Yandi gulusa nge.”

? Yula bana

 Bana sala bageste to mwa-senete

 Bana yimba ti kina

9.4 Na suka yonso, mfumu kwendaka nswalu kumona nki mutindu Daniele. Daniele tubaka nde Nzambi me tinda wanzio na Yandi kugulusa yandi.

 **Tangila bana : Daniele 6 :19-24**

19-20 Mfumu vutukaka na nzo na yandi. Mpimpa ya mvimba yandi lalaka ve. Na suka-suka, yandi kwendaka ntinu na dibulu ya bantambu.

21 Yandi bingaka Daniele nde : “Daniele, muntu ya Nzambi ya moyo ! Keti Nzambi yina ya nge ke sadilaka ntangu yonso kukaka kugulusa nge na bantambu ?”

22-23 Daniele vutulaka nde : “Mfumu, Nzambi tindaka wanzio na Yandi. Yandi kangaka minoko ya bantambu sambu bo sala mono kima ve. »

24 Bo basisaka yandi. Bo monaka ata mputa mosi ve na nitu na yandi.

25 Bantu yonso yina fundaka Daniele, bo losaka bo na dibulu. Ntangu bo me kuma ntete ve na nsi ya dibulu, bantambu bukaka mikwa na bo yonso.

26 Ebuna Mfumu Dariusi sonikilaka bantu yonso nde bo fweti zitisa Nzambi ya Daniele....

? Yula bana

 Bana sala bageste to mwa-senete

 Bana yimba ti kina

>|< **Kumanisa Malongi :**

Daniele landaka Mfumu Nzambi. Yo yina, konso lumbu, yandi sambaka Nzambi mbala tatu. Yandi waka nsoni ve kusamba. Yo yina, yandi kangulaka fenetre na yandi. Daniele zabaka nde mfumu me tula nsiku nde muntu lenda lomba kaka na yandi. Yandi zabaka nde ndola vandaka lufwa na dibulu ya bankosi. Kansi, yandi me zenga kaka kusamba Nzambi, ti Nzambi lundaka yandi.

 **Devoir sambu na bakristo :**

Keti nge ta vanda kwikama na bisambu bonso Daniele ? Ata bantu ya nkaka lenda mona nge ? Ata muntu ya nkaka kuseka nge ? Ketu nge ta yantika kuvanda kwikama na bisambu

kaka na mposo yai ke kwisa ?

♥ Verse ya Kulonguka :

Bana tuba verse mbala zole fraze na fraze na nima ya nge, moniteur. Mbala ya zole diaka, bo tuba yo ti tanga na misapi ntangu ya kusamba : mpimpa, mwini, suka, nkokila. Yula bo nki ntangu ya nkaka ikele. Ntangu ya nkaka kele ve. Beto samba ntangu yonso.

👤 Nkunga ya kwenda nzila mosi ti leso :

Daniele Sambaka Mingi

✝ Invitation sambu na bo ya me yamba Yesu ntete ve :

Kusamba kele mbote mingi sambu na bakristo, kansi ata nge samba konso lumbu, yina ta gulusa nge na masumu ve. Kuguluka, nge fweti balula ntima. Yai zola tuba nde nge mona mawa sambu na masumu na nge, na mpila nde nge zola kuyambula yo. Nge fweti yamba Yesu bonso Mvulusi na nge, ti kota na nzila na Yandi. Kana nge me tula ntima na Yesu ntete ve, kisambu ya ntete ya Nzambi zola kuwa na nge kele kisambu bonso yai, na ntima na nge yonso :

“Tata Nzambi, mono kele nkwa-masumu.
Kansi mono kwikila na Yesu, ti mono ndima
Yandi bonso Mvulusi na mono. Lolula mono,
ti kitula mono mukristo sesepiyai. Mono ke
zenga sesepiyai kubika masumu ti kulanda
Yesu. Na zina ya Yesu. Amen !”

Kana nge zola mono kusamba ti nge to kusadisa nge na mambu yai, kaka songa mono na nima ya classe. Mono ta vanda na kiese mingi kusadisa nge.

NSUKA YA LESO 9

📖 Kana ntangu lunga, longa mikanda ya Bible ndambu-ndambu. Bangindu kele na p. 43.

Leso 9

Daniele sambaka Nzambi na kikesa ata nsiku tubaka nde yandi sala yo ve. Bo losaka yandi na dibulu ya bantambu, kansi Nzambi lundaka yandi kuna.



***Kansi mono, mono ke lomba
Mfumu Nzambi Yandi sadisa mono.
Yandi ta gulusa mono.
Mpimpa ti mwini, suka ti nkokila
mono ke didilaka Yandi.
Yandi ta wa ndinga na
mono.***

Bankunga 55 :17-18

Leso 10-- Visio ya Daniele— Bimfumu ta nwana, ‘muntu ya mbi’ ta yala fioti, kansi Nzambi ta yala na nsuka.

Leso yai ke monika na Daniele 7.

I. PREPARASIO SAMBU NA MONITEUR-

☉ Kikuma ya Leso :

Bana ta vanda na kikesa kulanda Nzambi, ata konso mambu ke salama na ntoto, sambu bo ta bakisa nde Nzambi zaba yonso, ti Nzambi ta nunga na nsuka.

♥ Verse ya Kulunguka :

Ntangu yai, Mesia bakaka kiyeka, lukumu ti ngolo ya kimfumu na mpila nde bantu yonso ya nsi-ntoto, ata bo vanda nki dikanda to nki ndinga, bo sadila Yandi. Ngolo na Yandi ti kimfumu na Yandi, yo ta mana ve tii kuna... Daniele 7 :14

👤 Bankunga ya kwenda nzila mosi ti leso :

Mfumu ya Bamfumu Yonso
Ya' Ke na Ntoto Yonso na Maboko

II. REVISIO

† Kuyindula diaka baleso me luta :

Na leso me luta, beto monaka nde mfumu ya Babilonia tulaka nsiku ya kangaka bantu nzila kusamba Nzambi. Yai kwendaka nzila mosi ve ti ndinga ya Nzambi. Kansi Daniele zabaka nde beto fweti lemfuka na Nzambi kuluta bantu. Yandi landaka kaka kusamba Nzambi kukonda nsoni. Bo pesaka yandi ndola ya lufwa. Bo losaka yandi na kati ya bantambu ya makasi. Kansi Nzambi lundaka yandi. Bantambu salaka yandi mbi ve.

III. KULONGA LESO YAI

➔ Kuyantika Leso :

Beno me mona nde Nzambi pesaka Daniele ngolo kubakisa mambu ya bandosi, ti mpila Daniele tendulaka bandosi ya mfumu ya Babilonia. Bubu yai beto ta mona ndosi ya Nzambi pesaka na Daniele, yandi mosi.

🏠 Malongi ya nene ya leso yai (developpement) na banti ya malongi 4 :

10.1 Nzambi songaka Daniele bimfumu ya ta kwisa na nsi-ntoto na ntangu ya nsuka. Konso kimfumu vandaka na mbisi ya kusonga yo. Nzambi zaba mambu yonso ya ta salama.

📖 Tangila bana : Daniele 7 :1-8

1-3 Mono Daniele monaka na ndosi bambisi iya ya nene ke basika na masa...

4-5 Mbisi ya ntete bonso ntambu, mapapu bonso kumbi-kumbi. Mbisi ya zole bonso ours, me talama...

6-7 Mbisi ya nkaka kumonika bonso nkoi, mapapu ya ndeke, ba-ntu iya. Bo me pesa yo kiyeka na kuyala. Mbisi ya iya, mbisi mosi ya boma, ngolo mingi. Yo vandaka na bibongo kumi, kibongo ya fioti ya nkaka kubasika na kati na yo. Kibongo yango tulaka lulendo.

? Yula bana

🏠 Bana sala bageste to mwa-senete

👤 Bana yimba ti kina

10.2 Nzambi songaka Daniele nde na nsuka ya mambu yonso, Nzambi mosi ta yala.

📖 Tangila bana : Daniele 7 :9-14

9 Mono monaka bo kutula bakiti ya kimfumu. Mbuta-Muntu mosi ya mununu mpenza kwisaka kuvanda na kiti yina mosi. Bilele na Yandi vandaka ya mpembe bonso mvula ya neze. Kiti na Yandi ya kimfumu vandaka kumonika bonso tiya ke pela.

10 Bantu bamile na bamile vandaka kusadila Yandi. Bazuzi yantikaka kukangula mikanda ti kusambisa makambu.

13 Kaka na ntangu yango, mono monaka Muntu. Bo nataka Yandi na ntwala ya Mbuta-Muntu yina ya mununu.

14 Mesia bakaka kiyeka, lukumu ti ngolo ya kimfumu na mpila nde bantu yonso ya nsi-ntoto, ata bo vanda nki dikanda to nki ndinga, bo sadila Yandi. Ngolo na Yandi ti kimfumu na Yandi, yo ta mana ve tii kuna...

? Yula bana

🏠 Bana sala bageste to mwa-senete

👤 Bana yimba ti kina

10.3 Na bilumbu ya nsuka, ‘muntu ya mbi’ ta telama. Yandi ta vwenza Nzambi na kutuba na yandi. Yandi ta pesa mpasi mingi na bantu ya Nzambi bamvula 3 ti demi.

 **Tangila bana :** Daniele 7 :15-21, 23-25.

20-21 Mono zolaka kuzaba disongidila ya bibongo kumi, ti kakibongo ya kwisaka kudasika na nima. Yo vandaka kutuba lulendo. Mono monaka nde kibongo yina vandaka kunwanisa bantu ya Nzambi, ti bedisa bo.

24-25 Bibongo yina kumi kele bantotila kumi yina ta kwisa kudasika. Ntotila ya nkaka ta kwisa kudasika yina ta finga Nzambi-Mpungu. Yandi ta monisa bantu ya Nzambi mpasi. Bo ta vanda na maboko na yandi bamvula tatu ti demi.

 **Yula bana**

 **Bana sala bageste to mwa-senete**

 **Bana yimba ti kina**

10.4 Ata bantu nwana na ntoto, ata bo pesa bakristo mpasi, Kimfumu ya Nzambi ta nunga na nsuka, ti Yesu ta yala nsi-ntoto yonso.

 **Tangila bana :** Daniele 7 :22, 27

22 Kansi Mbuta-Muntu yina ya Mununu ta kwisa kunwanina bantu ya Nzambi-Mpungu ti kunungisa bo. Ntangu me lunga sambu na bantu ya Nzambi kubaka kimfumu.

27 Ngolo ti lukumu ya bimfumu yonso ya nsi-ntoto, Nzambi-Mpungu ta pesa yo na bantu na Yandi. Kimfumu yina ta mana ve...

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Nzambi songaka Daniele na ndosi mambu ya ta salama na ntangu ke kwisa, tii na nsuka ya ntoto. Bimfumu ya nkaka ta yala na ntoto. Bo ta nwana bo na bo. Na bilumbu ya nsuka, ‘muntu ya mbi’ ta kwisa yina ta pesa bantu ya Nzambi mpasi. Ata mbi kusalama mutindu yina, yonso kele na maboko ya Nzambi. Yandi ta nunga, ti Yandi ta yala na nsuka.

 **Devoir sambu na bakristo :**

Beto bakristo, beto vanda na boma ve. Yonso ya salama, ata ya mbote to ya mbi, yo kele na maboko ya Nzambi na beto. Yandi ta nunga na nsuka. Beto sadila Yandi na kikesa mposo yai tii kuna.

 **Verse ya Kulonguka :**

Bana tuba verse mbala 2 fraze na fraze na nima ya nge, moniteur. Na nima, bo tuba yo na “chaine” mbala zole. Mwana ya ntete tuba ndinga ya ntete, mwana ya zole ndinga ya zole, etc.

 **Bankunga ya kwenda nzila mosi ti leso :**

Mfumu ya Bamfumu Yonso
Ya’ Ke na Ntoto Yonso na Maboko

 **Invitation sambu na bo ya me yamba Yesu ntete ve :**

Nzambi lunga kubaka lukumu yonso. Yandi salaka beto, ti Yandi ta yala na nsuka ya mambu yonso. Bimfumu yonso ya ntoto kele na diboko na Yandi.

Kansi probleme, yo yai : Bible ke songa nde beto me sosa nzila ya Nzambi ve, kansi nzila ya beto mosi. Yo yina, beto me sala mambu mingi ya me pesa Yandi kiese ve.

Kansi Yandi zolaka beto, bantu ya mbi. Yandi tindaka Mwana na Yandi sambu na kugulusa beto. Yesu zingaka ntangu yonso na mpila ya pesaka Tata na Zulu kiese. Bantu ya kimpala tulaka Yandi na zulu ya kulunsi. Kansi bo bakisaka ve nde Yandi kwisaka sambu Yandi lenda kufwa bonso makabu sambu na kufuta mfuka na masumu na beto.

Yandi vandaka Mwana ya Nzambi, yo yina, Yandi telamaka na lufwa. Bantu mingi monaka Yandi na moyo na nwala Yandi vutukaka na Tata na Yandi.

Yandi tubaka nde bayina ke mona mpasi sambu na masumu na bo, bo balula ntima. Bo bika nzila ya masumu, bo yamba Yesu na maboko zole. Yandi ta lolula bo ti pesa bo ntima ya mpa ya zola kulanda nzila ya Nzambi.

Kana yai kele nge, nge lenda balula ntima na Yesu bubuyai. Nge lenda binga Yandi, kulomba Yandi kugulusa nge.

NSUKA YA LESO 10

 Kana ntangu lunga, longa mikanda ya Bible ndambu-ndambu. Bangindu kele na p. 43.



Nzambi songaka Daniele bambisi iya na ndosi, songaka bimfumu ya fweti kwisa kuyala ntoto. Bilumbu ya mbi fweti kwisa, kansi na nsuka, Nzambi fweti yala.

**Ntangu yai, Mesia bakaka
kiyeka, lukumu ti ngolo ya
kimfumu**


**na mpila nde
bantu yonso
ya nsi-ntoto,**

ata bo vanda

**nki dikanda to nki ndinga,
bo sadila Yandi.**

**Ngolo na Yandi ti kimfumu
na Yandi,**

yo ta mana ve tii kuna...



Daniele 7 :14

Leso 11--Wanzio Gabriele songaka Daniele nki ntangu Mesia fweti kwisa.

Leso ke monika na Daniele 9.

I. PREPARASIO SAMBU NA MONITEUR-

☉ Kikuma ya Leso :

Bana ta bakisa nde beto yonso ke na mfunu ya Mvulusi, sambu beto me landa ve nzila ya Nzambi. Bo ta zaba mbote-mbote nde Mesia yina kele Yesu.

♥ Verse ya Kulunguka :

Kansi ntangu kilumbu yina ya Nzambi tulaka, yo lungaka, Nzambi tindaka Mwana na Yandi... Galatia 4 :4a

👤 Bankunga ya kwenda nzila mosi ti leso :

Mwana Yina Nani ?

Ya' ke na Ntoto Yonso na Maboko

II. REVISIO

† Kuyindula diaka baleso me luta :

Nzambi pesaka Daniele mayele kubakisa bandosi. Yandi songaka Daniele mambu mingi na bandosi na yandi mosi. Yandi songaka yandi bimfumu ya ta kwisa ti mpasi ya ta salama. Kansi mambu ya nene Nzambi songaka yandi vandaka yai : Na nsuka, Nzambi ta yala mvu ya mvu.

III. KULONGA LESO YAI

➔ Kuyantika Leso :

Bubuyai beto ta mona mambu ya nkaka ya nene-nene ya Nzambi songaka Daniele.

🏠 Malongi ya nene ya leso yai (developpement) na banti ya malongi 4 :

11.1 Nzambi bambukisaka Daniele nde Yandi ta bika Yerusalem kuvanda mpamba bamvula 70.

📖 Tangila bana : Daniele 9 :2

9 :2 Mono Daniele vandaka kutanga mikanda ya Nzambi ti kuyindula bamvula 70 ya bwala

Yeruzalemi fweti bikala mayumbu, mutindu Mfumu Nzambi tubaka na profete Yermia.

? Yula bana

🏠 Bana sala bageste to mwa-senete

👤 Bana yimba ti kina

11.2 Daniele sambaka Nzambi ,ti ndimaka masumu na yandi ti bantu na yandi Bayuda.

📖 Tangila bana : Daniele 9 :3-19

3-4 Ebuna mono sambaka Mfumu Nzambi ngolo. Mono buyaka kudia sambu na kusamba Yandi ti kundima masumu ya bantu na mono :

5 Beto me salaka masumu. Beto me buyaka kusala nzila ya mbote ya Nge songaka beto.

6-8 Beto wilaka ve bapofete. Nge vandaka na raison kupesa beto ndola ya mingi mpidiyai. Ee, Mfumu Nzambi, nsoni kele na beto, sambu beto salaka Nge mbi.

9-13 Yo yina, kusinga yina ya Nge sonikaka, yo bwilaka beto. Kansi tii ntangu yai, beto me meka ntete ve kubika mbi na beto to kulanda mambu ya kieleka sambu na kupesa Nge kiese.

16-17 Pardo, kuwila Yeruzalemi makasi diaka ve. Bantu yonso penepene, bo ke finga yo ti beto bantu na Nge. Sambu na lukumu na Nge mosi Mfumu, yindula diaka nzo na Nge ya bo me fwaka. Vutula yo mutindu yo vandaka.

19 Mfumu Nzambi, lolula beto ! Sadisa beto....sambu na lukumu na Nge mosi !

? Yula bana

🏠 Bana sala bageste to mwa-senete

👤 Bana yimba ti kina

11.3 Nzambi tindaka wanzio Gabriele kusonga yandi nde yonso kele na lukanu ya Nzambi.

📖 Tangila bana : Daniele 9 :20-24

21-22 Ntangu mono vandaka kusamba, wanzio Gabriele kwisaka. Yandi nde : « Daniele, mono me kwisa awa kupesa nge mayele.

(Somere :) Gabriele songaka Daniele nde Nzambi vandaka dezia na lukanu nki ntangu Yandi ta kangula nzila nde bo tunga Yeruzalem diaka. Yandi vandaka na lukanu sambu na bantu na Yandi yonso.

? **Yula bana**

✚ **Bana sala bageste to mwa-senete**

👤 **Bana yimba ti kina**

11.4 Nzambi vandaka na lukanu mpi kulolula masumu na Mesia yina ya Yandi ta tinda. Gabriele songaka Daniele ata nki ntangu Yandi ta kwisa.

📖 **Tangila bana :** Daniele 9 :25

25-26 ...*Katuka ntangu Nzambi me tuba na kutunga diaka Yeruzalemi tii ntangu Mesia yina ya Yandi me solaka ta kwisa, nge fweti tanga bamvula 483. Na nima, bo ta fwa Yandi...*

Galatia 4 :4 ke songa beto nde bu ntangu ya Yandi tulaka lungaka, Nzambi tindaka Mwana na Yandi Yesu kaka mutindu Yandi silaka.

? **Yula bana**

✚ **Bana sala bageste to mwa-senete**

👤 **Bana yimba ti kina**

>|< Kumanisa Malongi :


Mambu ya kuluta nene ya Nzambi songaka Daniele vandaka kukwisa ya Mesia. Yandi ta kwisa bamvula 483 na nima bo yantika kutunga Yeruzalemi diaka. Daniele zabaka nde yandi ta mona yo ve, kansi yandi ndimaka yo na lukwikilu. Bu ntangu Nzambi tulaka lungaka, Yandi tindaka Yesu Mesia, kaka mutindu Yandi silaka.

👋 **Devoir sambu na bakristo :**

Bana bakristo, nge zaba mpila Yesu me lungisa baprofesi yonso ya Mesia. Yandi mosi kele Mesia. Na mposi yai, keti nge ta songa bantu ya nkaka ?

♥ **Verse ya Kulonguka :**

Bana tuba verse mbala 2 fraze na fraze na nima ya nge, moniteur. Na nima, bo sala cercle. Bo tambula pas mosi na konso ndinga. Bo balula ti sala yo diaka na direction ya nkaka. Bo balula na nganda to tuba ndinga mosi na konso pas. Bo balula diaka kuvutuka na cercle ya fioti, kutuba ndinga mosi na konso pas.



👤 **Bankunga ya kwenda nzila mosi ti leso :**

Mwana Yina Nani ?

Ya' ke na Ntoto Yonso na Maboko


✚ **Invitation sambu na bo ya me yamba Yesu ntete ve :**

Daniele zolaka Nzambi mingi, kansi yandi ndimaka nde yandi mpi vandaka muntu ya masumu. Bible ke songa beto nde beto yonso me vila nzila ya Nzambi. Beto me buya nzila na Yandi. Beto me sola nzila ya beto mosi. Beto me sala mambu mingi ya Nzambi ke zola ve. Beto kele na makambu ti Yandi. Beto kele na mfunu ya Mvulusi, Mesia. Beto kele na mfunu ya Yesu Kristo, Mwana ya Nzambi.

Kana nge ke mona mawa sambu na mbi ya nge me sala, kana na ntima nge zola kubika nzila ya masumu, kukota na nzila ya Yesu, kaka binga Yandi na ntima na nge. Kaka songa Yandi nki kele na ntima. Yandi ta kuwa nge, sambu Yandi me telama na lufwa, kele na moyo bubuyai. Yandi lunga kugulusa nge.

NSUKA YA LESO 11

📖 Kana ntangu lunga, longa mikanda ya Bible ndambu-ndambu. Bangindu kele na p. 43.



Leso 11

Nzambi
songaka
Daniele na
ntwala nki
ntangu
Yesu
Mesia ta
kwisa.

Yandi
kwisaka
kaka na
ntangu ya
Nzambi
tubaka.

**Kansi ntangu kilumbu
yina ya Nzambi tulaka, yo
lungaka, Nzambi tindaka
Mwana na Yandi...**

Galatia 4 :4a

Leso 12--Nzambi songaka Daniele nde mambu yonso ya ta kwisa kele na maboko na Yandi.

Leso yai ke monika na Daniele 10-12.

I. PREPARASIO SAMBU NA MONITEUR-

☉ Kikuma ya Leso :

Bana ta vanda na boma ve, kansi na kikesa, sambu bo ta bakisa nde Nzambi ta lunda beto bantu na Yandi tii na nsuka.

♥ Verse ya Kulonguka :

... « *Mambu ya muntu me mona ve mpi me wa ve, mambu ya muntu me banza ve nde yo lenda vanda, yina mambu mpenza Nzambi me yidikila bantu yina ke zola Yandi.* »

1 Korinto 2 :9

👤 Bankunga ya kwenda nzila mosi ti leso :

Mfumu Zaba Nzila na Mono
Ya' ke na Ntoto Yonso na Maboko

II. REVISIO

† Kuyindula diaka baleso me luta :

Mbala mingi na mukanda ya Daniele, beto me mona nde Nzambi zaba yonso ya fweti salama na ntangu ke kwisa. Ee, Yandi ke twadisa yonso. Yandi ke sala luzolo na Yandi, ata bantu sala mbote to mbi, ata bo ndima Yandi to buya Yandi. Yandi songaka ata ntangu ya Mesia na Yandi ta kwisa, ti Yesu Kristo kwisaka na ntangu ya Nzambi songaka Daniele. Beto bakristo vanda na boma ve. Nzambi na beto ke yala mvu ya mvu !

III. KULONGA LESO YAI

➔ Kuyantika Leso :

Mbala mingi, Nzambi songaka nki ta salama na bavisio ya bambisi. Bambisi yina songaka bimfumu ya nene ya ta kwisa na ntoto. Mbala mingi, batribu ti bimfumu ya Afrika me songa ngolo to mayele na bo na mbisi ya kele kusonga bo. Na bisika ya nkaka, nge ta mona mwa-kiteki ya mbisi yina na nti ya mfumu, na kielo ya lupangu ya mfumu, etc.

Kiteso mosi na bansi ya nkaka ya ntoto mpi. Yo yina, Nzambi songaka Daniele bambisi ya vandaka kusonga bimfumu ya ta kwisa. Nzambi zabaka yonso ya fweti salama.

🏠 **Malongi ya nene ya leso yai (developpement) na banti ya malongi 2 :** [*Atasio, Moniteur ! Ata banti ya malongi kele kaka zole, malongi yo mosi kele nda. Yo yina, beto me pesa kaka somere ti ndambu bitini ya baverse.*]

12.1 Ata beto mona yo ve, bawanzio ya mbote ya Nzambi ti bawanzio ya mbi kele kunwana. Lombilu na beto lenda sadisa bo ya mbote.

📖 Tangila bana somere yai :

Daniele zolaka kubakisa mbote bandosi yonso ya Nzambi me songa yandi. Yo yina, yandi vandaka kusamba Nzambi ngolo. Nzambi tindilaka yandi wanzio sambu na kupesa yandi kikesa.

Wanzio simbaka yandi. Yandi nde: “*Daniele, Nzambi zola nge na kuwa boma ve. Nzambi me wa bisambu na nge katuka kilumbu ya ntete.*” Na kilumbu ya ntete, Nzambi mpi tindaka wanzio ti mvutu.

Kansi na nzila, bawanzio ya nkaka yina ke landa Nzambi ve, bo kwisaka kunwanisa wanzio ya Nzambi. Bo bawanzio ya vandaka kusala na kati ya bamfumu ya nene ya ntoto.

Wanzio simbaka Daniele ti songaka yandi mbala ya zole nde, “Nzambi ke zola nge. Kuwa boma ve. Vanda na kikesa.”

Wanzio songaka Daniele nde yandi fweti vutuka kunwana diaka ti bawanzio ya bamfumu ya nkaka ya nene-nene. Kaka wanzio mosi na zulu na yandi lenda sadisa—wanzio Mishele, yina ya Nzambi tulaka kukengilaka bantu ya Israele.

? Yula bana

🏠 Bana sala bageste to mwa-senete

👤 Bana yimba ti kina

12.2 Nzambi songaka Daniele nde kieleka, ntangu ya mpasi mingi ta kwisa na bilumbu ya

nsuka. Kansi yonso keke na maboko ya Nzambi tii na nsuka.



Tangila bana somere yai :

Nzambi songaka Daniele bimfumu mingi ya ta yala na ntoto, ti mpasi ya fweti kwisa na bilumbu ya nsuku.

Kansi Daniele ti bantu yonso ya Nzambi, bo lenda vanda na kikesa. Nzambi keke na mambu yonso na maboko na Yandi. Daniele ta zinga ve kumona bima mingi ya Nzambi me songa yandi. Kansi ata yandi kufwa, Nzambi ta tedimisa yandi ti bantu yonso na Yandi na kilumbu ya nsuka.

Daniele yulaka Nzambi, « Mfumu, nki mutindu mambu yai yonso ta suka ? Nzambi vutulaka nde : « Kumona mpasi ve. Kwenda kaka na ntuala. Nge ta fwa, kansi na kilumbu ya nsuka, nge ta telama na kubaka matabisi na nge. »



Yula bana



Bana sala bageste to mwa-senete



Bana yimba ti kina

>|< Kumanisa Malongi :

Nzambi songaka Daniele nde bawanzio keke kusala konso ntangu sambu na kulungisa luzolo ya Nzambi. Ata bampeve ya mbi kunwanisa bo, bo lenda nunga ve. Nzambi fweti nunga na nsuka, ti beto bantu na Yandi lenda sadisa na lombilu na beto.

Ata beto kufwa bonso Daniele, yina mpi ta sala beto kima ve, sambu Nzambi ta tedimisa bantu na Yandi yonso na kilumbu ya nsuka. Na nsuka, beto ta baka matabisi na diboko ya Nzambi. Beto ta vanda ti Yandi na Kimfumu na Yandi mvula na mvula.



Devoir sambu na bakristo :

Bana bakristo, vanda na boma ve. Vanda na mawa ve. Beto ke tula Nzambi ntima nde Ndinga na

Yandi keke kieleka. Yandi ta yala ya mvula na mvula.



Verse ya Kulonguka :

« Mambu yina ya muntu me monaka ve mpi me waka ve, Mambu yina ya muntu me banzaka ve nde yo lenda vanda, yina mambu mpenza ya Nzambi me yidikilaka bantu yina ke zolaka Yandi. »

1 Korinto 2 :9



Bankunga ya kwenda nzila mosi ti leso :

Mfumu Zaba Nzila na Mono

Ya' ke na Ntoto Yonso na Maboko



Invitation sambu na bo ya me yamba Yesu ntete ve :

Kansi nge, kana nge me tula ntima na Yesu Kristo ntete ve, nge keke muntu ya Nzambi ntete ve. Mambu ya kiese ke kinga nge ve, kansi mambu ya mawa. Nzambi salaka nge. Yandi pesaka nge moyo. Yandi monaka nde nge vandaka na probleme ya masumu. Yo yina, Yandi tindaka Mwana na Yandi Yesu Kristo sambu na kugulusa nge. Yesu fwaka na zulu ya kulunsi sambu na kufuta mfuka ya mbi yonso ya nge. Yandi telamaka na lufwa. Yandi ta pesa nge moyo ya mpa bubu yai, kana nge ta balula ntima. Kana nge ta tula vivuvu yonso na Yandi kaka. Binga zina ya Yesu. Songa Yandi nde nge zola kubika nzila ya masumu, kukota na nzila na Yandi. Yandi me sila nde konso muntu yina kwisa na Yandi, Yandi ta buya yandi ve.

NSUKA YA LESO 12



Kana ntangu lunga, longa mikanda ya Bible ndambu-ndambu. Bangindu keke na p. 43.



Leso 12

**Beto
sadila Yesu na
kikesa, sambu
Yandi ta yala
mvu ya mvu.**

**« Mambu ya muntu me mona
ve mpi me wa ve,
mambu ya muntu me banza ve
nde yo lenda vanda,
yina mambu mpenza Nzambi
me yidikila bantu yina ke zola
Yandi. »**

1 Korinto 2 :9

Bangindu Kulonga Bana Mikanda ya Bible--

Mikanda ya Baprofete ya Sonikaka Mingi :

Daniele ti Ezekiele kele na kati ya baprofete ya sonikaka mingi. Beto me mona dezia Yezaya, yina sonikaka na ntwala Yeruzalem bwaka, ti Yeremia, yina sonikaka kaka na ntwala ti na ntangu ya Yeruzalem bwaka. Mikanda ya baprofete ya sonikaka mingi kele :

Yezaya

Yeremia ti Mawa (Kudila ya Yeremia)

Ezekiele

Daniele

Ezekiele ti Daniele kwendaka na kimpika na Babilonia. Ntangu bo vandaka kuna, bo sonikaka mikanda na bo, na kati ya bamvula 70 ya kimpika na Babilonia.

Bana yimba nkunga

Mikanda ya baprofete ya tubaka mingi

Mikanda ya baprofete ya tubaka mingi

Yezaya, Yeremia, ye mukanda ya mawa

Ezekiele ti Daniele, kwikama na Nzambi.

Yo vandaka histoire. Mbandu : Kieleka bo tulaka Daniele na dibulu ya bankosi.

Bimvuka ya mikanda :

Bana longuka bimvuka ya nene ya mikanda ya Kuwakana ya Ntama :


Mikanda ya Moize

Mikanda ya Histoire ya Israele
na ntoto na bo

Mikanda ya Poesi

Mikanda ya Baprofete ya sonikaka mingi

Mikanda ya Baprofete ya sonikaka fioti



**Beto kele
awa.**

Moniteur, kana bana me yikama kuyimba nkunga yai, yika kukina ti yo.

Na ntwala, na nima

Kana bana me zaba kutuba mikanda tanu ya baprofete ya tubaka mingi na ndonga, songa bo mukanda mosi na kati ya kimvuka yina, ti bo fweti songa nki mukanda ke kwisa na ntwala na yo, to na nima na yo.

Ritima

Moniteur tuba mikanda yina na mpila ritimika (kansi kutuba, kuyimba ve). Bana repeter na nima na yandi. Bo bula maboko to makulu to nikisa nitu na mpila moniteur ta songa bo.

Profesi to Histoire ?

Beto tula Ezekiele ti Daniele na kati ya mikanda ya profesi sambu profete Ezekiele ti profete Daniele sonikaka yo. Mikanda yai mpi kele na profesi mingi na kati—mambu ya ke songa nki ta kwisa. Kansi histoire mingi ke monika na kati, mpi. Mambu ya bo sonikaka, yonso salamaka ya kieleka.

Mambu ya kuluta nene sambu na kukwisa na Yandi na mikanda Ezekiele ti Daniele kele nde Daniele songaka nki ntangu Yesu ta kwisa.

**Atasio, Moniteur ! Mukanda ya ke landa yai,
« K22 Kuvutuka Kutunga Diaka » (Esdrasi,
Nehemia, Agai, Zakaria, Estere, Malashi)**

Na ntwala ya Mesia, to na nima ?

Mikanda yai yonso kele na parti ya ntete ya Bible ya beto binga « Kuwakana ya Ntama. » Yo songa mambu ya salamaka na ntwala kukwisa ya Yesu Mesia. Yo songaka nde Yandi fweti kwisa.

Linya
ya
Ntangu

Profete Ezekiele



Ezekiele 4

Nzambi songaka
Ezekiele nsudi ya
masumu ti zuzema
ya Nzambi.

Ezekiele 28

Nzambi songaka Ezekiele
kisina ya lulendo ya
bamfumu tu zuzema yo ta
benda.



Ezekiele 37

Nzambi songaka Ezekiele nde kele Nzambi
ya pesa moyo na bantu ya kufwa.



586

Av. J.C

Bamvula 70 na Babylon—

Daniele 2
Daniele sosaka
ngangu ya Nzambi
kaka.



Daniele 1

Daniele ti banduku na yandi
buyaka madia ya mfumu.

Profete Daniele

Mfumu Nabo bwaka na
lulendo. Ndola na yandi
kuzinga bonso mbisi bamvula 7.



Daniele 3

Banduku ya Daniele buyaka
kusamba kiteki. Bo losaka
bo na ful ya tiya mingi.



Profete Daniele



Daniele 5

Mfumu Baltazare salaka

lulendo, ti Nzambi manisaka kimfumu na yandi. Kimfumu ya Persia kumaka kuyala na Babilonia.

Daniele 10

Nzambi pesaka Daniele vision ya bimfumu ke kwisa.



Daniele 10-12

Nzambi songaka Daniele nde mambu yonso ya ta kwisa kele na maboko na Yandi.

539 Av. J-C

Daniele 6

Daniele landaka kusamba Nzambi. Yo yina, bo losaka yandi na dibulu ya bantambu.



Profete Daniele

516

Av. J-C



Daniele 11

Wanzio Gabriele songaka Daniele nki ntangu Mesia ta kwisa.

Bankunga Beto Sadila na Mukanda Yai

[Moniteur, NB: Kana nkunga kele na kidimbu na ntwala ya titre, so ke songa nde nge lenda kuwa yo na kanal na beto ya YouTube Ecodim Congo @ecodimcongo1985. To, na site na beto ya internet, www.ecodimafrigue.com.]

🔊 Banzambi ya Nkaka

Banzaaa-mbi ya nkaka
Bantu me sala yo
Nge kaka ke Nzambi
Ya salaka beto ! (O Yesu) *[repeteer yonso]*

🔊 Daniele Sambaka Mingi

Daniele vandaka mpika
Ya sadilaka Nzambi
Na ntima ya' zengaka
Kulanda kaka Yandi.

Mvutu :

Munoko na yandi tubaka
Mayele mingi kaka
Sambu Nzambi vandaka
Na yandi kiese kaka.

Ya' bakisaka bandosi
Nzambi songaka Yandi
Yandi monaka mambu
Na ntwala yo salamaka.

Mvutu :

Munoko na yandi tubaka
Mayele mingi kaka
Sambu Nzambi vandaka
Na yandi kiese kaka.

Daniele sambaka mingi
Suka, midi, mpimpa
Bambeni kangaka yandi
Losaka ya' na bankosi.

Mvutu :

Ata kuna, na bankosi
Boma vandaka ve
Wanzio kangaka minoko
Ya bankosi yonso.
(Wanzio kangaka minoko
Ya bankosi yonso.)

🔊 Kikesa Kele

Kikesa kele
'Ntwala Nzambi
Sambu Yesu me vulusa mono !
Butamaka na Mpeve n'Yandi ,
Yandi kusukulaka ntima !

Mvutu :

Nkunga na mono
ya kiese, yo yai :
kembila Yesu, ntangu yonso !
Nkunga na mono
ya kiese, yo yai :
kembila Yesu, ntangu yonso !

Kikesa kele 'Ntwala Nzambi
Sesepi mpi kuna na zulu !
Bawanzio fweti mona kiese
Sambu Yesu me vulusa mono !
Boma vandaka ntete mingi
Nani ta lunga na ntwala Nzambi ?
Mbi na mono vandaka nene
Menga ya Yesu katulaka Yau !

Kudikulumusa na Meso ya Nzambi

Kudikulumusa na meso ya Nzambi
(Kudikulumusa na meso ya Nzambi)
Kudikulumusa na meso ya Nzambi
(Kudikulumusa na meso ya Nzambi)

Ye Yandi ta nangula nge (Lumbu na lumbu)
Ye Yandi ta nangula nge !

Mawa, Mawa Kuvanda Mwana Satana

Mawa, mawa, kuvanda mwana-Satana
(repeteer)
O, walewale, O, walewale-e !
Kiese, kiese, kuvanda mwana ya Nzambi
(repeteer)
O, wale-e, O, wale-e !

Mfumu ya Bamfumu Yonso

Mfumu ya bamfumu yonso,
Nkembo ! Aleluya !
Mfumu ya bamfumu yonso,
Nkembo ! Aleluya !

Yesu, Mfumu ya ngemba !
Nkembo ! Aleluya !
Yesu, Mfumu ya ngemba !
Nkembo ! Aleluya !

🔊 Mfumu Zaba Nzila na Mono

Mfumu zaba nzila na mono
Mono fweti Ianda kaka
Mfumu zaba nz'ila na mono
Mono fweti Ianda kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono

Mono fweti Ianda kaka !

◀ **Mo' Ta Kwisa na Nzambi na Lulendo Ve**

Mo' ta kwisa na Nzambi na lulendo ve
Mo' ta kwisa na lulendo ve
Mo' ta kudikulumusa na ntwala n'Yandi
Mo' ta kwisa na lulendo ve.

Mvutu :

Sambu Yandi kele Nzambi
Mo' ke Nzambi ve.
Kele Yandi me salaka mono !

◀ **Mwana Yina Nani ?**

Mwana yina nani?
Yesu !
Mwana yina nani ?
Yesu !
Yandi Mesia
Mwana ya Nzambi
Nani ? Yesu !

Beto kumisa Yesu!
Yesu!
Beto kumisa Yesu!
Yesu!
Yandi Mesia
Mwana ya Nzambi
Nani ? Yesu !

Nani ta landa Yandi ?
Mono!
Nani ta landa Yandi ?
Mono!
Yandi Mesia
Mwana ya Nzambi
Nani ? Yesu !

Nani Kele Ngolo ?

Nani kele ngolo ?
Nzambi ikele ngolo
Kuluta bantu yonso.

◀ **Nzambi Kuwa na Suka**

Nzambi na mono ta kuwa
Konso ntangu mono samba
Ata n' suka, Ata mpimpa,
Nzambi ata kuwa !

Mvutu:

Nzambi kuwa na-a su-uka
Nzambi kuwa na mi-idi
Nzambi kuwa na nkokila
Konso ntangu beto samba !

Ya' Ke na Ntoto Yonso na Maboko

Ya' ke na ntoto yonso
Na maboko (3x)
Na maboko na Yandi !

Ya' ke na nge ti mono
Na maboko (3x)
Na maboko na Yandi !

◀ **Yezaya 53 :6**

Beto yonso, beto vandaka
kuyungana bonso mameme,
Konso muntu na nzila na yandi,
Mawa na beto !

Ebuna Mfumu Nzambi tulaka
Mbi na beto yonso na zulu
na ntu na Yandi, Yandi Mesia
Kiese na beto ! (wa-la-la-la !)
Kiese na beto !